

民國肇縣志

鞏縣志卷二十三

邑人 劉蓮青 纂輯

張仲友

邑人劉鎮華鑒定

邑人劉鎮海參閱

固始萬自逸讐校

文徵一

章實齋既謂藝文不載書目濫入詩文雜體為失因別具文徵擇其有關一邑之故事者而載之遂推而上言古者十五國風八國國語以及晉乘楚檮杌與夫各國春秋之旨其說可謂昌矣夫一邑之文豈足遽例於是

鞏縣志卷二十三

文徵一

一

經川圖書館刊

然而其山川之藉以訂正政教之有所敷施哲人君子嘉言懿行之垂諸久遠非文字其曷以明之用是輯而為文徵

劉定公勞趙孟

周左傳

天王使劉定公勞趙孟於穎館於維汭劉子曰美哉禹功明德遠矣微禹吾其魚乎吾與子弁冕端委以治民臨諸侯禹之力也子盍亦遠績禹功而大庇民乎對曰老夫罪戾是懼焉能恤遠吾儕偷食朝不謀夕何其長也劉子歸以語王曰諺所謂老將知而耄及之者其趙孟之謂乎為晉正卿以主諸侯而儕於隸人朝不謀夕棄神人矣神怒

民叛何以能久趙孟不復年矣神怒不歆其祀民叛不卽其事祀事不從又何以年

客謂周君解韓讓

戰國策

嚴氏爲賊而陽豎與焉道周周君留之十四日載以乘車駟馬而遣之韓使人讓周周君患之客謂周君曰正語之曰寡人知嚴氏之爲賊而陽豎與之故留之十四日以待命也小國不足亦以容賊君之使又不至是以遣之也

說昭翦和東周

戰國策

昭翦與東周惡或謂昭翦曰爲公畫陰計昭翦曰何也西周甚憎東周嘗欲東周與楚惡西周必令賊賊公因宣言東周也以西周之於王也昭翦曰善吾又恐東周之賊已而以輕西周惡之於楚遽和東周

馮且閒殺昌他

戰國策

昌他亡西周之東周盡輸西周之情於東周東周大喜西周大怒馮且曰臣能殺之君予金三十斤馮且使人操金與書閒遺昌他書曰告昌他事可成勉成之不可成亟亡來亡來事久且泄自令身死因使人告東周之候曰今夕有姦人當入者矣候得而獻東周東周立殺昌他

說周相重周取秦

戰國策

三國隘秦周令其相之秦以秦之輕也留其行有人謂相

國曰秦之輕重未可知也秦欲知三國之情公不如遂見秦王曰請謂王聽東方之處秦必重公是公重周重周以取秦也齊重故有周而已取齊是周常不失重國之交也

杜赫欲重景翠於周

戰國策

杜赫欲重景翠於周謂周君曰君之國小盡君子重寶珠玉以事諸侯不可不察也譬之如張羅者張於無鳥之所則終日無所得矣張於多鳥處則又駭鳥矣必張於有鳥無鳥之際然後能多得鳥矣今君將施於大人大人輕君施於小人小人無可以求又費財焉君必施於今之窮士不必且為大人者故能得欲矣

三 經川圖書館刊

鄭朝為周復取祭地於趙

戰國策

趙取周之祭地周君患之告於鄭朝鄭朝曰君勿患也臣請以三十金復取之周君予之鄭朝獻之趙太卜因告以祭地事及王病使卜之太卜譴之曰周之祭地為崇趙乃還之

溫人之周

戰國策

溫人之周周不納客即對曰主人也問其巷而不知也吏因囚之君使人問之曰子非周人而自謂非客何也對曰臣少而誦詩詩曰普天之下莫非王土率土之濱莫非王臣今周君天下則我天子之臣而又為客哉故曰主人君

乃使吏出之

周文君不免工師藉

戰國策

周相呂倉見客於周君前相工師藉恐客之傷已也因令人謂周君曰客者辯士也然而所以不可者好毀人周文君免工師藉相呂倉國人不說也君有閔閔之心謂周文君曰國必有誹譽忠臣令誹在已譽在上宋君奪民時以爲臺而民非之無忠臣以掩蓋之也子罕釋相爲司空民非子罕而善其君齊桓公宮中七市女閭七百國人非之管仲故爲三歸之家以掩桓公非自傷於民也春秋記臣弑君者以百數皆大臣見譽者故大臣得譽非國家之美也故衆庶成疆增積成山周君遂不免

鞏縣志卷二十三

文徵一

四

經川圖書館刊

周最說石禮

戰國策

周最謂石禮曰子何不以秦攻齊臣請令齊相子子以齊事秦必無處矣子因令周最居魏以其之是天下制於子也子東重於齊西貴於秦秦齊合則子常重矣

說楚解周

戰國策

楚攻雍氏周穰秦韓楚王怒周周之君患之爲周謂楚王曰以王之強而怒周周恐必以國合於所與粟之國則是勁王之敵也故王不如速解周恐彼前得罪而後得解必厚事王矣

蘇厲說周君止相國往陽翟

戰國策

昭獻在陽翟周君將令相國往相國不欲蘇厲爲之謂周君曰楚王與魏王遇也主君令陳封之楚令向公之魏楚韓之遇也主君令許公之楚令向公之韓今昭獻非人主也而主君令相國往若其王在陽翟主君將令誰往周君曰善乃止其行

史厲爲周君謀說韓秦

戰國策

秦假道於周以伐韓周恐假之而惡於韓不假而惡於秦史厲謂周君曰君何不令人謂韓公叔曰秦敢絕塞而伐韓者信東周也公何不與周地發重使使之楚秦必疑不信周是韓不伐也又謂秦王曰韓強與周地將以疑周於秦寡人不敢弗受秦必無辭而令周弗受是得地於韓而聽於秦也

鞏縣志卷二十三

文徵一

五

經川圖書館刊

戰國策以此合昭獻在陽翟共爲一篇實爲兩事故分之

蘇子爲東周說西周下水

戰國策

東周欲爲稻西周不下水東周患之蘇子謂東周君曰臣請使西周下水可乎乃往見西周之君曰君之謀過矣今不下水所以富東周也今其民皆種麥無他種矣君若欲害之不若一爲下水以病其所種下水東周必復種稻種

稻而復奪之若是則東周之民可令一仰西周而受命於君矣西周君曰善遂下水蘇子亦得兩國之金也

顏率解齊求九鼎

戰國策

秦興師臨周而求九鼎周君患之以告顏率顏率曰大王勿憂臣請東借救於齊顏率至齊謂齊王曰夫秦之爲無道也欲興兵臨周而求九鼎周之君臣內自畫計與秦不若歸之大國夫存危國美名也得九鼎厚寶也願大王圖之齊王大悅發師五萬人使陳臣思將以救周而秦兵罷齊將求九鼎周君又患之顏率曰大王勿憂臣請東解之顏率至齊謂齊王曰周賴大國之義得君臣父子相保也

鞏縣志卷二十三

文徵一

六經川圖書館刊

願獻九鼎不識大國何塗之從而致之齊齊王曰寡人將寄徑於梁顏率曰不可夫梁之君臣欲得九鼎謀之暉臺之下少海之上其日久矣鼎入梁必不出齊王曰寡人將寄徑於楚對曰不可楚之君臣欲得九鼎謀之於葉庭之中其日久矣若入楚鼎必不出王曰寡人終何塗之從而致之齊顏率曰敝邑固竊爲大王患之夫鼎者非效醢壺醬甄耳可懷挾提挈以至齊者非效鳥集烏飛兔興馬逝灘然止於齊者昔周之伐殷得九鼎凡一鼎而九萬人輓之九九八十一萬人士卒師徒器械被具所以備者稱此今大王縱有其人何塗之從而出臣竊爲大王私憂之齊

王曰子之數來者猶無與耳顏率曰不敢欺大國疾定所從出倣邑遷鼎以待命齊王乃止

趙累爲東周謀說景翠

戰國策

秦攻宜陽周君謂趙累曰子以爲何如對曰宜陽必拔也君曰宜陽城方八里材士十萬粟支數年公仲之軍二十萬景翠以楚之衆臨山而救之秦必無功對曰甘茂羈旅也攻宜陽而有功則周公旦也無功則削跡於秦秦王不聽羣臣父兄之義而攻宜陽宜陽不拔秦王恥之臣故曰拔君曰子爲寡人謀且奈何對曰君謂景翠曰公爵爲執圭官爲柱國戰而勝則無加焉矣不勝則死不如背秦援

宜陽公進兵秦恐公之乘其弊也必以寶事公公中慕公之爲已乘秦也亦必盡其寶秦拔宜陽景翠果進兵秦懼遽效煮棗韓氏果亦效重寶景翠得城於秦受寶於韓而德東周

爲東周謂楚韓

戰國策

東周與西周戰韓救西周爲東周謂韓王曰西周者故天子之國也多名器重寶案兵而勿出可以德東周西周之寶可盡矣東周與西周爭西周欲和於楚韓齊明謂東周君曰臣恐西周之與楚韓寶令之爲已求地於東周也不如謂楚韓曰西周之欲入寶持二端今東周之兵不急西

周西周之寶不人楚韓楚韓欲得寶卽且趣我攻西周西
周寶出是我爲楚韓取寶以德之也西周弱矣

工部員外郎杜甫墓誌銘

并序

唐元

稹

序曰余讀詩至杜子美而知古人之才有所總萃焉始堯
舜之君臣以賡歌相和是後詩人繼作歷夏殷周千餘年
仲尼緝拾選練取其干預教化之尤者三百篇其餘無聞
焉騷人作而怨憤之態繁然猶去風雅日近尙相比擬秦
漢已還采詩之官旣廢天下俗謠民謳歌頌諷賦曲度嬉
戲之詞亦隨時間作至漢武帝賦柏梁詩而七言之體具
蘇子卿李少卿之徒尤工爲五言雖句讀文律各異雅鄭

鞏縣志卷二十三

文徵一

八

經川圖書館刊

之音亦雜而詞意闊遠指事言情自非有爲而爲則文不
妄作建安之後天下文工遭羅戰爭曹氏父子鞍馬間爲
文往往橫槊賦詩故其遒文壯節抑揚怨哀悲離之作尤
極於古晉世風概稍存宋齊之間教失根本士以簡慢矯
飾相尙文章以風容色澤放曠精清爲高蓋吟寫性靈流
連光景之文也意義格力無取焉陵遲至梁陳淫豔刻飾
佻巧小碎之詞又宋齊之所不取唐興學官大振歷世之
文能者互書而又沈宋之流研練精切和順聲勢謂之爲
律詩由是而後文變之體極焉而又好古者遺近務華者
去實效齊梁則不逮於晉魏工樂府則力屈於五言律切

則骨格不存閑暇則纖穠莫備至於子美所謂上薄風雅下該沈宋言奪蘇李氣吞曹劉掩顏謝之孤高雜徐庾之流麗盡得古今之體勢而兼昔人之所獨專矣如使仲尼考鍛其旨要尙不知貴其多乎哉苟以其能所不能無可無不可則詩人以來未有如子美者是時山東人李白亦以奇文取稱時人謂之李杜余觀其壯浪縱恣擺去拘束摸寫物象及樂府歌詩誠亦差肩於子美至若鋪陳始終排比聲韻大或千言次猶數百詞氣豪邁而風調清深屬對律切而脫棄凡近則李尙不能歷其藩翰況堂奧乎余嘗欲條析其文體別相附與來者爲之準病懶未就爾適

子美之孫嗣業啟子美之柩襄耐事於偃師途次於荆楚雅知余愛言其大父之爲文祈余爲誌辭不可絕余因系其官閥而銘其卒葬云系曰晉當陽侯杜氏下十世而生依藝今家於鞏依藝生審言審言善詩官至膳部員外郎審言生閑閑生甫爲奉天令甫字子美天寶中獻三大禮賦明皇奇之命宰相試文文善授率府曹屬京師亂步謁行在授左拾遺以直言失官出爲華州司功尋遷京兆功曹劍南節度使嚴武拔爲工部員外參謀軍事旋又棄其官扁舟下荆楚間竟以寓卒旅殯岳陽享年若干夫人宏農楊氏女父曰司農少卿怡四十九年終嗣子曰宗武病

不克葬沒命其子嗣業以家貧無以給喪收拾乞丐焦勞晝夜去子美沒後餘四十年然後卒先人之志亦足爲難矣銘曰

惟元和之癸巳粵某月某日之佳辰合窆我杜子美於首陽之山前嗚呼千載而下曰此先生之古墳

故東州節度使盧公傳

李華

盧坦字保衡河南人父巒贈鄭州刺史坦少孤初任韓城

縣尉歷宣城

一作武

縣鞏河南三縣尉其吏河南知捕賊杜

黃裳爲河南尹謂坦曰某家子與惡人遊破家產公爲捕

賊盍使察之坦抑

集作抑

曰凡居官終始廉白祇入俸錢者

鞏縣志卷二十三

文徵一

十

經川圖書館刊

雖歷大官亦無厚蓄以傳其能多積財者必剝下以致如

其子孫善守之是天富不道人家也

集有字

若恣其不道

以歸於人坦以爲宜故不使察黃裳驚視因使升就

集有堂字

坐自此日加重及黃裳爲吏部侍郎將授以太常博士會

鄭滑節度使李復表請爲判官得監察御史薛盈珍爲監

軍使累侵軍政坦每據理以拒之盈珍嘗曰盧侍御所言

皆公我故不違也有善吹笛者大將十餘人同啟復請以

爲重職坦適在復所復問曰衆所請可許否坦笑曰大將

等皆久在軍積勞亟遷以爲

集作及

右職奈何自薄欲與吹

笛少年

集有同字

爲列耶復告諸將曰盧侍御言是也大將慚

遽走出就坦謝且曰向聞侍御言某等羞愧汗出恨無穴可入李復病甚盈珍以甲士五百人入城州人皆駭恐坦遽止之盈珍不敢違復卒盈珍主兵事制以姚南仲代盈珍方會客言曰姚大夫書生豈將才也坦私謂人曰姚大夫外雖柔中甚剛又能斷監軍若侵之必不受禍自此萌矣若從公喪而西必遇姚大夫吾懼爲所留以及禍遂潛去姚果以牒來請終以不逢得解及盈珍與姚有隙從事多黜死者王緯觀察浙西兼鹽鐵使請坦爲轉運判官及李錡代請如初轉殿中侍御史錡所行多不循法坦每爭之詞旨深切聽者皆爲之懼累求去不得凡在錡府七年

官不改錡惡狀滋大坦慮及難又非可以力爭遂與裴度李約李稜繼以罷去後數年詔追錡入錡遂扇兵士殺留後以留己因發兵取宣州爲其將所擒送斬死順宗皇帝寢疾王叔文居翰林決大政天下懍懍坦說宰相韋執誼速自立皇太子以樹國本執誼深納其言將以爲殿中侍御史時御史中丞亦以爲請王叔文使人請坦將以爲員外郎知揚州集作子留後坦假他辭不受叔文不說故事皆不行及王叔文貶出坦遂爲殿中侍御史權德輿爲戶部侍郎請爲本司員外郎尋轉戶部兼侍御使知雜事未久遷刑部郎中知雜事如故赤縣尉有爲御史臺所按者京

兆尹密救之上使品官釋之坦時在宅臺吏以告坦自中丞請覆奏然後奉詔品官遽以聞上曰吾固宜先命所司遂使宣詔乃釋數月遷御史中丞賜紫衣分司東都尋歸西臺初上禁絕罷鎮節度使等獻財貨載於赦條時山南節度使柳晟浙東觀察使閻濟美皆罷鎮有所獻坦劾奏之晟濟美皆白衣待罪上召坦對因曰柳晟閻濟美所獻皆家財非刻下卿勿劾坦對曰陛下所以布大信於天下者赦令是也且兩臣首違詔臣職當舉奏陛下不可失大信于天下上曰朕既受之矣如何坦對曰出歸有司以明陛下之德上善之竟爲宰相所寢李錡之誅有司將自淮

安王之下墳墓皆毀之宰相不敢言坦奏曰李錡與國同族其反逆不道身旣斬死并殺其子罪塞矣若將追毀祖父墳墓臣以爲不可淮安王有佐命之功且國真又死王事漢誅霍禹不毀霍光之墳房遺愛伏誅罪不誅於玄齡此前代及聖朝之故事也康誥曰父子兄弟罪不相及若將易之母乃罪及良臣且傷大體乎上改容曰非卿言何由知此一無此字遂命停毀仍禁杜樵給伍尸守淮安王之墳以示不忘其功上策試賢良方正之士有懷書策入者將深罪之坦奏言四方不明知所犯必以爲策辭抵忤宜輕其責上從之江陵節度使裴均入爲僕射行香時將處常

侍諫議之上坦引故事及姚南仲近例以爲節集作裴均

怒曰姚南仲何足爲例也坦應曰姚僕射但不是勅使耳

何不足以爲例也遂爲均所排改右集作庶子坦初爲殿

中當杜黃裳爲相故累遷凡二十有三月而至中丞及居

官守道正言日聞而人忘其遷之速也數月宰相裴瑄白

以爲宣歙池等州都圍練觀察處置節使兼御史中丞宣

州刺使劉闢之逆其婿蘇強坐誅死強兄弘爲晉州從事

自免歸人莫敢用坦奏言蘇弘有才行以其弟強坐誅死

劉闢反誅弘與強相去三千里必不通謀以強廢弘非陛

下惜才之意因請弘以爲判官上曰假令蘇強當時不就

鞏縣志卷二十三 文徵一 十三

經川圖書館刊

誅尙且宜隨材而任之況在其兄邪遂得請及在宣州江

淮大旱米價日長或說節其價以救人坦曰宣州地狹穀

不足皆他州來若制其價則商不來矣價雖賤則無穀奈

何後米斗及二百商人舟米以來者相望坦乃借兵食多

出於市以平其直一作人賴以生當塗縣有渚田久廢坦

以爲歲旱苟貧人得食取傭可易爲功於是渚田盡闢藉

傭以活者數千人又以羨錢四十萬代稅戶之貧者故旱

雖甚而人忘災五年冬遷刑部侍郎充諸道鹽鐵轉運使

減冗職八十員自江之南補置付之院監使無所與數月

轉戶部侍郎判度支坦更歷重位以朝廷是非大體爲已

務故多所陳請或上封告泗州刺史薛謩爲代北水運使時畜馬數百匹有異馬不以獻者事下度支乃使巡判官往驗之未返上遲之使品官劉泰昕案其事坦上陳以爲陛下旣使有司驗之又使品官往豈大臣不足信於品官乎臣請先罷免疏三奏上於是遂追劉泰昕舊賦於州郡者或非土地所有責厚價以市之他境坦悉條奏各去其所無罷宣歙旨支米收其價以移之於湖南免江南鹿腊配之鄜汝州以韓重華爲代北水運使開廢田列柵二十益兵三千人歲收粟二十萬石八年西受降城爲河所壞城使周懷義上言宰相議徙天德故城坦以受降城張仁愿

鞏縣志卷二十三 文徵一

十四 經川圖書館刊

所作當磧石得制北狄之要若避河流宜遶三數里其費不多天德故城北倚山去河甚遠失制虜要地非使因使水運使察視遠近利病以圖進上使品官強文彩覆之文彩言與坦合上召坦使條陳將行之竟爲宰相所奪乃出坦爲劍南東川節度使周懷義數月憂卒燕重旻代其位遂移天德故城軍士歸怨因殺重旻屠其家初坦與宰相李絳議論多合絳藉爲已助及坦出半歲而絳罷坦至東川盡罷兩稅外山澤鹽并權率之籍夷人歌之綿劍二州有通文成州路每歲奏發二千兵以防西蕃其實不過一二百人坦乃奏於衝地置戍鎮之上誅蔡州詔發兵二千

人於安州每朔望使人問其父母妻子其有疾者與之藥
故兵士皆感恩無逃者及薨贈禮部尙書

十月一日奏告永定陵真宗皇帝表 宋 庠

伏以就盈紀月司閉成冬惕悽愴于非寒悼劬勞于罔極
恭惟尊諡皇帝道勳冠古德澤涵幽罄圖牒以輸祥擁慶
靈而祚世眇冲攸賴摧感何云

十月一日奏告永定陵莊獻莊懿莊惠皇太后表 宋 庠

伏以寒律甫升孟躔適會方班吉朔實感先慈恭惟尊諡
皇太后德茂坤元化流椒極溢話言于彤史闕柔景于仙

鞏縣志卷二十三 文徵一 五 經川圖書館刊

園追荷顧存舉成哀塞

十月一日奏告永定陵真宗皇帝表 宋 庠

伏以天運弗停水行茲始感霜露非寒之惕結衣冠遊月
之悲恭惟尊諡皇帝功濟三靈道包衆甫軼鴻名于上世
叢寶訓于來昆皇照靡渝時思罔極逃瞻靈寢無喻哀悰
十月一日奏告永定陵莊獻莊懿莊惠皇太后表

宋 庠

伏以冬管命時歲陰布序俯愴戒寒之候聿深追遠之思
恭惟尊諡皇太后坤載輸和人倫託始藹母闈之慈範溢
女史之芳猷茂庇眇冲永懷顧復淒凝肇集感塞何云

中元節奏告永定陵真宗皇帝表

宋庠

伏以秋序迎郊望辰旅夕邈企山園之重載驚霜露之濡
按歷未遑因心若隕惟百靈之護野協六氣之在天嘉節
甫新哀悰永歎

冬節賀永定陵真宗皇帝表

宋庠

伏以歲律就陰冬元復始禮緣朝慶感倍時思恭惟尊諡
皇帝躬蹈聖猷誕膺耿命勒號榮而高世詒統業以當天
神駕夕躋仙園在望永懷丕烈罔喻哀悰

冬節賀永定陵莊獻莊懿莊惠皇太后表

宋庠

鞏縣志卷二十三

文徵一

去經川圖書館刊

伏以流景弗居微陽載始爰屬嘉辰之會永懷慈訓之遐
恭惟尊諡皇太后淑哲綏猷儉慈寶德茂擁存之善教協
詒燕之深仁運隔仙遊感鍾長日展巡未卜哀涕無從

爲南郊預前于永定陵奏告真宗皇帝莊獻莊懿莊

惠皇太后表

宋庠

伏以推策涓辰燔柴令典適勤眇質躬對上靈惟齋禱之
多儀並訓謀之成式更祈慈蔭助集鴻休

賜祠部郎中知河南府陵臺令兼永安縣趙世長勅

書

勅趙世長近雨水衝注奉先橋汝部押兵士救得本橋事

務故在昔先皇恭朝陵寢跨茲溫洛肇建輿梁比涇雨之
載零伊衆川之交注汝克勤障捍訖免隳摧言念勤勞豈
忘嘉尙故茲獎諭想宜知悉

宋庠集
內制

荆王墓誌銘

宋 祁

慶歷三年冬十二月皇叔荆王疾病辛丑皇帝輦如其宮
見王臥內禮如家人上手爲調藥王泣且謝卽陳被恩三
朝無以報厚德今保首領仆牖下儻使有知從二先帝遊
死骨不朽惟以兒女長累陛下上惻然謂王素康強雖今
小恙行且瘳勅近醫藥以自愛因賚白金五千兩王固辭
曰幸一見天子奚賜之敢叨上高王之讓特詔從之明年

鞏縣志卷二十三

文徵一

七
經川圖書館刊

春正月乙亥遂薨上卽時臨弔哭之慟廢五日朝壬午御
素服宰相率百官詣崇政門奉慰遣中大夫相其室以葢
內事詔翰林學士臣某內侍省都知臣守忠護其葬以庀
外事制詔中書門下其贈以天策上將軍充徐二州牧燕
王印綬太常上諡爲恭肅又詔臣祁爾應敘王治行縷碧
款隧俾永其傳臣再拜稽首伏自念懵學扁聞不能周知
王德今天子展親飾終震動顯幽自王弗寧遣太醫高手
踵相及于路逮終歸賜不貲計比葬三醑其喪則上之所
以眷王王之所以承上其仁其賢方付史氏以昭無極臣
雖缺然牽綬尙懼稱道失當爲斯文羞而日迫事嚴不及

讓避是用詢玉牒撫行狀次第其辭謹按王諱元儼太宗皇帝第八子母曰德妃王于諸子最幼太宗特愛之終日侍左右在宮中真宗嗣統王年十三始以檢校太保左衛上將軍兼御史大夫爵爲公國于曹進拜平海軍節度使俄同中書門下平章事加檢校太傅爲廣陵郡王授昭武安德二軍節度真拜王以榮爲國稍兼侍中易安靜武信軍檢校太尉兼中書令大中祥符八年宮屋火延燬內廬坐火禁不謹削武信一軍節度降端王始築宮于外他日謝上痛自咎責真宗嘉慰之復以鎮海安化二帥節改王于彭册拜太保以天平易安化拜太傅以永清橫海帥節

更王通繼授陝川大都督合保平定國兩軍又王涇今上卽位以地尊屬近進拜太尉尙書令仍前兼以鎮安忠武二鎮徙王定賜贊拜不名又加詔書不名頃之更王鎮賜劍履上殿拜太師以河陽三城節度卽王孟翌日行京兆尹兼鳳翔尹卽軍府爲節度乃王荆又進雍州牧兼鳳翔牧久之以國在荆授荆揚二州牧卽荆南淮南節度爲大使仍賜入朝不趨大抵賜功臣號者九其文至二十有四勳上柱國階開府儀同三司邑戶二萬七千實食一萬二千四百人臣之極摯止矣王美姿質眉目如畫廣額豐頤舉止矜重在平居無少懈祀容恭朝容莊賓容肅宴容侃

侃而和雖震之軒然麟之儀然瑜潤而葩鮮不足侔已事
德妃尤謹每有疾焚薰請命而王進飯視妃一再以增減
居喪以孝稱躬繪太宗聖容纖微克肖天光日潤若可就
而望者性閒敏博覽文史好飛白書拂灑道妍結字甚工
作辭賦數百篇務求理致寡嗜欲左右姬侍裁令奉巾櫛
箕帚不受佞讒翦翦者或伺隙膚訴必正色折愧由是內
外無違言天聖以來王自以春秋高蒙殊禮不敢數朝請
常闔門申申以居會朝廷調軍興議省費王卽表上公使
錢歲五千萬佐用度上不獲已權許半入以申王恭晚節
頗好絲竹亭觀日夜自娛蓋健粹所賦必有寄于物而後

能適云始天下之言貴而親莫若王而王乃小心恭慎在
骨肉閒始終無纖芥使宗室本支日愛以敦語德與功其
何如哉孫宣公爽嘗授經必語人曰王賢王也世以爲知
言娶夫人張氏彰德軍節度使承德之女循法度膺象服
承寧王家以岐許晉三爲夫人國不幸前七年薨追命魏
國夫人子四人男曰允熙右監門衛大將軍滁州刺史贈
博州防禦使曰允良鎮國軍節度觀察留後曰允迪靜難
軍節度觀察留後曰允初汝州團練使諸孫嬪然或冠或
笄問安也蟬璽襲乎庭來寧也鎡幌交乎闈此所謂朱芾
皇皇室家君王者哉初魏國之葬也當王墓之次故卽用

穴以三月庚寅具鹵簿鼓吹奉樟宮自京師如河南之永安以夏四月癸卯啟魏國之塋從禮而合諸墓嗚呼王之爲子孝爲弟悌爲叔父寵而虔爲父義而有慈甲子一終啟手足焉未爲頤而艾也雖然壽皇烈憑天祉駝鈕盞華餘四十年忠孝之範光矣榮哀之事終矣銘曰

太宗九支潞篤于病昭成弗永真宗受命潤邢蘇華並王而藩代天之工咸罔登年穆穆燕王太宗所愛真宗則之寵錫光大上曰叔父屬尊以親不名不趨劍履振振王最壽耆夾輔顯承道具美完纖訾不興癸亥之冬冰介木披楚陳尤甚禮氛前知困而遺忠神不奪守勉訓諸子表貸醫咎上命中人悉取其書或筆或書分藏石渠厥仗央央刻章煒煒詔從儉葬俾顯王美永熙西原橋梓後先旣利旣安以佑來昆

皇從姪全州觀察使追封新興侯墓誌銘

宋 祁

侯諱從郁字仲文昭信軍節度使英國公惟憲之子母曰莒國和夫人英公之禰曰潭王德芳自潭而上昭穆嚴尊玉牒史官書之故不著獨著侯事侯幼悟警有志行尸居而自修佚安而不流旣就傅務學尤力臨虞世南隸楷絕工射能命中景祐中悉召宗室觀書太清樓詔侯賦詩應

旨輒上帝稱善他日有詔褒美輦下榮之于慶歷元年夏
六月遘疾薨于第享年四十有四上爲廢朝勅中貴人護
葬所以賜含追卹之良厚留窆普濟禪坊卜兆之未從且
言懷也侯仕始右班殿直十遷至左屯衛大將軍文州刺
史爵階勳邑稱是配曰夫人河東薛氏封丹陽郡君甚宜
其家六男子世奕太子右衛率府率世褒故太子右司禦
率府率世將太子右監門率府副率世秩故太子右內率
府副率世覲太子右內率府副率幼未名諸子皆孝謹以
肥家則侯之垂裕當有以致之者歲直涪灘始詔鴻臚啟
殯卽河南永安之先塋月舍己巳日舍癸卯克葬贈全州

鞏縣志卷二十三

文徵一

三

經川圖書館刊

觀察使新興侯禮也昔詩人之稱文王其辭曰文王孫子
本支百世我祖宗受命而帝德溥流長過文王遠甚而其
支胄蕃衍雖千萬世尙無有底止則文字之傳可以已乎
銘曰

帝孫之子燾我不祉嗣而承者何千萬祀

南陽郡君李氏墓誌銘

宋 祁

夫人姓李氏系出隴西太子右贊善大夫惟良之女武勝
軍節度使英國公至之孫叢先累祥克誕令淑家人嗃厲
之法女功織紉之事耳濡目染有如天成旣笄今左千牛
衛大將軍宗立委禽焉二姓綴歡三商有行于是奉烝嘗

焉以恭接姆妣焉以和鳴鳩一其仁采繫謹其職以將軍之貴詔拜南陽郡君方賦脂田膺象服飾魚軒之華信照玉珈之煌煌降疾無瘳享年三十有四以慶歷三年七月殯奉先僧舍明年夏四月鴻臚奉詔將柩而西癸卯克葬河南永安之西原子四人仲舒仲琳仲晁仲偲並太子右內率府副率嗚呼老宜偕而將軍悼之慈可恃而率府喪之天之弗庸悲夫銘曰

永照西園圖厥域史臣作銘鏤幽石魂兮有知此惟宅

故夫人黃氏墓誌銘

并序

尹洙

河南樂泳來致其父水部君書且自言曰泳母以賢行稱

鞏縣志卷二十三 文徵一

三 經川圖書館刊

於外氏以暨我家不幸早世不及封號以歿藁殯者三十年今葬有日敢因父書求文以誌於壙予不得讓夫人姓黃氏世衣冠父慶長司勳員外郎母王氏新泰縣君夫人年二十一爲水部配四十二以疾終於興元之南鄭寶元二年正月六日葬河南永安唐興鄉雙塔里樂氏自水部君之大父贈兵部侍郎諱史以文章爲通儒其後世有顯人遂爲河南大族夫人居世次爲冢婦性寬裕言語動作爲諸女法雖僮侍未嘗聞其厲辭通音律樂施與宗族疏近交稱其德生四子滋進士中第今爲著作佐郎浚早卒泳冲皆舉進士二女長適供奉官馮維禹次適太廟齋郎

麻公授水部君名許國以材能爲尙書水部員外郎其銘曰
婦道治內潛德弗章有子而才乃顯其光刻石墓門圖徽
不忘

故宣德郎守大理寺丞累贈司封員外郎皮公墓誌

銘并序

尹洙

公諱子良字漢公其先襄陽人曾祖日休避廣明之難徙
籍會稽及錢氏王其地遂依之官太常博士贈禮部尙書
祖光業佐吳越國爲其丞相父粲元帥府判官歸朝歷鴻
臚少卿公幼能屬辭淳化中以家集上獻初尙書以文章

鞏縣志卷二十三

文徵一

三

經川圖書館刊

取重於咸通乾符世降及丞相鴻臚皆以文雄江東三世
俱有編集總百餘卷至是悉以奏御得召試對便坐賜出
身歷汾州介休并州榆次二縣主簿時靈夏用師仍歲饋
輓公當督其行不以嚴期暴民事亦以濟遷饒州錄事參
軍無爲軍巢縣令用知己薦授大理寺丞監筠州酒稅大
中祥符七年正月二十五日以疾終於任年五十三公爲
吏尙寬平不煩條教所至民宜其治去必見思世爲吳越
顯族樂散施晚年窮匱仰俸入裁自充然均給疎屬終不
少懈知者嘉其孝友夫人管氏賢明有法度二男長鏞早
亡次仲容今爲太常博士三女適曹經宿拱之張奎皆士

人二孫公理公高並幼上籍田歲公以子五品得以某官告其第夫人封壽安縣太君明年太君以疾終寶元二年十月二十七日太博奉公之喪葬河南永安縣某鄉某里壽安縣君耐焉銘曰

皮氏擅名厥初襄陽後家於南再世以昌公事本朝其惟舊邦才奮而通命艱弗充公葬河南是成公志公有令子既孝禮遂家河南爲子孫始

鞏縣孔子廟記

尹洙

石佚見尹河南文集

宋興八十載天下久承平天子端拱率祖宗法度講禮文

鞏縣志卷二十三 文徵一

西經川圖書館刊

登雋賢欲以一聲教格民於太和爲吏者循上化其治大概務寬平恥以持法刺奸取能名專用厚風俗嚮廉讓爲休故郡府立學校尊先聖廟十六七河南爲天子西都建國子學稱號與東都侔其屬邑曰鞏縣距府百里据大道之衝河洛所會舟車之饒民以富强先是縣之先聖廟暴爲水壞材亡地汙不復興治凡釋奠行禮寓令署中且十年大理寺丞李君惟章既蒞邑顧曰地要而民富禮教所以先今聖廟圯而弗謀亦非所以稱畿縣之劇甚爲鄉老吏民羞其易而新之於是相縣署之西偏以營焉且上其狀于府得民施宅祠錢六萬以濟其役募善工購良材堂

邃而崇像嚴以尊學有舍齊有次踰時而成邑民休之相與議曰茲廟之興旣營旣勤皆由吾李君不志不刻無以章君之化遂以文來請某按著令縣皆立先聖廟釋奠以春秋唐韓文公所謂郡縣通祀孔子與社稷者也自五代亂祠官所領在郡邑者頗廢墜不舉閒或增祀率淫妄不經獨孔子社稷其奠祭器幣莫之能損益真所謂通祀哉今朝廷向儒術西都建學官聚生員爲郡國倡始鞏爲西畿劇縣能尊先聖以厲學者則他邑之興學從善又當自鞏而始且不失著令通祀之典李君之舉其賢而法哉某年月日尹洙記

鞏縣志卷二十三 文徵一

三 經川圖書館刊

皇從姪衛州防禦使遂國公墓誌銘 歐陽修

惟遂昭裕公宗顏字希聖太宗皇帝之曾孫潞恭憲王元佐之孫鎮江軍節度使兼侍中郇國公允成之長子初除西頭供奉官歷內殿崇班禮賓崇儀副使六宅使改左屯衛大將軍封州刺史遷左金吾衛大將軍領復州團練使左衛大將軍領郢州防禦使拜衛州防禦使公好學通王氏易喜爲詩藏書數萬卷性聰敏多能至於琴奕之藝佛老之說所學必通履行修謹未嘗有過失每燕見侍上讀易賦詩數賜器幣詔書褒美嘗召宴太清樓賦裸玉詩爲諸皇子第一上尤嘉賞賜繪綵二百段有詩集十卷至和

二年九月壬戌以疾薨享年四十有八初其疾也上遣中貴人押國醫治之既薨輟視朝一日勅有司具駕將視其喪以雨不克遣中貴人厚加賻卹乃贈昭信軍節度使太常考行諡曰昭裕權厝于東法濟寺夫人太原郡君郭氏燕王從義之裔孫子男三人長曰仲連右千牛衛將軍次曰仲丹仲筠皆太子右內率府副率早卒女四人長適左侍禁潘若旦今亡次適內殿承制閣門祗候郭士選次一作其二一有亦字亡以嘉祐五年十月乙酉葬於河南永安縣銘曰

學而通行益修中充實外譽優見於言帝所褒雖不克施

鞏縣志卷二十三

文徵一

三
經川圖書館刊

於事斯可以銘諸幽

皇從姪筠州團練使安陸侯墓誌銘 歐陽修

安陸侯宗誦字行敏太宗皇帝之曾孫潞恭憲王元佐之孫鎮江軍節度使兼侍中郇國公允成之第二子初除西頭供奉官歷內殿崇班承制改右千牛衛將軍領茂州刺史天子祀明堂推恩遷領筠州團練使至和元年八月癸卯以疾卒享年四十有六天子哀卹贈安州觀察使追封安陸侯權厝於薦嚴佛寺嘉祐五年十月乙酉葬於河南永安縣夫人長樂郡君賈氏子男五人其二早卒次仲緘右千牛衛將軍二人尚幼未名女八人長適右侍禁尉世

庸再適右侍禁郭昭簡今亡次適右班殿直劉起次適陳敦今亡次適王整次適董昭遜次適張經今亡次適程翼皆右班殿直最幼入太和宮爲道士惟侯學知爲詩好義喜施性端謹能修容止進退有法未嘗少懈銘曰
思無邪容則莊蔚然有儀人所望學而不止久愈彰銘昭厥美示不忘

皇從姪康州刺史高密侯墓誌銘

歐陽修

惟高密侯宗師字靖之太宗皇帝之曾孫潤恭靖王元份之孫濮王允讓之第七子明道元年爲右侍禁遷左侍禁改太子左清道率府副率累遷金紫光祿大夫檢校國子

鞏縣志卷二十三 文徵一

三 經川圖書館刊

祭酒行太子左清道率府率兼侍御史騎都尉封天水縣開國男食邑三百戶居三歲遷右監門衛將軍兼御史大夫轉勳上騎都尉進爵子加食邑三百戶天子祀明堂推恩遷右領軍衛大將軍轉勳輕車都尉進爵伯加食邑三百戶天子有事於南郊推恩轉勳上輕車都尉進爵侯加戶四百至和元年五月領康州刺史嘉祐元年十月甲子暴疾薨於家享年二十有九贈密州觀察使追封高密侯惟侯沈靜寡言寬仁好學未嘗有過失夫人濮陽郡君吳氏生男一人仲廩太子右內率府副率女三人尙幼以嘉祐五年十月乙酉葬於河南永安縣銘曰

好仁而靜敏學而明雖不永年而垂令名卜安於此其固其寧

皇從姪右監門衛將軍廣平侯墓誌銘

歐陽修

廣平侯宗沔字上善太宗皇帝之曾孫潤恭靖王元份之孫濮王允讓之第二子初授銀青光祿大夫檢校國子祭酒行太子左監門率府率兼監察御史武騎尉遷太子左清道率府率兼侍御使轉勳上騎都尉天子祀明堂推恩遷左監門衛將軍轉勳輕車都尉天子有事於南郊推恩轉上輕車一有都尉二字天水縣開國男食邑三百戶明年二月

鞏縣志卷二十三

文徵一

三

經川圖書館刊

甲辰以疾卒享年二十贈洺州防禦使追封廣平侯權厝於承天佛寺惟侯爲人明敏好學能爲文辭娶高氏封仁壽縣君子男二人仲足仲霄皆太子右內率府副率早卒以嘉祐五年十月乙酉葬於河南永安縣銘曰性之明學有方壽不隆永以藏

皇從姪右監門衛將軍墓誌銘

歐陽修

太祖皇帝之長子曰吳懿王德昭之曾孫彰化軍節度使舒國公惟忠之孫萊州防禦使東萊侯從恪之子曰右監門衛將軍贈右武衛大將軍世衡字夏卿母曰平原郡夫人米氏世衡生早孤而平原夫人教之以學性沈敏自爲

兒童不好弄既長好學問通周易孟子喜爲詩暇則學射法而已在諸昆弟爲最幼而尤以孝悌見稱初補殿直改太子右衛副率天子祀明堂推恩拜右監門衛將軍累遷至金紫光祿大夫檢校國子祭酒兼御史大夫柱國天水縣開國伯食邑九百戶嘉祐四年六月丙寅以疾卒享年三十有一娶王氏太原縣君子男二人令展令持皆率府副率早卒女一人尙幼嘉祐五年十月乙酉葬於河南永安縣銘曰

學問以爲文孝悌以爲本其華已榮而實斯殞銘以藏之以昭其韞

鞏縣志卷二十三

文徵一

三 經川圖書館刊

武當侯世宣爲吳懿王德昭之曾孫題稱皇從孫是也此篇題之皇從姪亦應爲皇從孫

皇從孫右屯衛大將軍武當侯墓誌銘

歐陽修

惟武當侯世宣吳懿王德昭之曾孫彰國軍節度使舒國公惟忠之孫武勝軍節度觀察留後韓國公從藹之子母曰太寧郡君慕容氏惟侯生於富貴而不習爲驕侈少好學喜購古書奇字遇人卑恭事親孝悌累官至左

題目作右屯

衛大將軍嘉祐三年五月己卯以疾卒享年三十有六初娶天水縣君王氏再娶金城縣君張氏子男六人長曰令

鐸左千牛衛將軍次日令進令禱令惜皆太子右內率府副率其二幼末名以嘉祐五年十月乙酉葬於河南永安縣以天水縣君耐焉銘曰

孝行之本謙德之躬壽胡不隆閱此幽宮

安陸侯夫人長樂郡君賈氏墓誌銘 歐陽修

夫人姓賈氏曾祖廷瓌累贈左神武大將軍祖官至四方館使昭州團練使父德滋前左班殿直夫人以選歸於安陸侯宗訥至和元年五月以疾卒享年三十有六權厝於薦巖佛寺以嘉祐五年十月乙酉耐安陸侯以葬銘曰
配德惟諧卜藏斯吉其固其安于此幽室

鞏縣志卷二十三

文徵一

三 經川圖書館刊

右監門衛將軍夫人金堂縣君錢氏墓誌銘

歐陽修

夫人姓錢氏餘杭人也曾祖吳越忠懿王俶祖衛州防禦使惟遣父文思副使象輿錢氏自五代以來尊中國效臣順世稱其忠子孫蕃昌至今不衰夫人生於盛族孝謹勤儉性巧慧喜字書年十有四以選爲右監門衛將軍世準之配封金堂縣君嘉祐二年九月庚子以疾卒享年二十有八子男二人令糴令煊皆太子右內率府副率早亡女三人皆尙幼以嘉祐五年十月乙酉葬於永安之原銘曰
生宜其室歿安其藏銘昭其味以永不忘

右監門衛將軍夫人武昌縣君郭氏墓誌銘

歐陽修

夫人姓郭氏曾祖恕右千牛衛將軍祖遵式洛苑使父昭

晦一作誨左侍禁夫人聰明孝謹能讀書史善書畫喜浮圖

之說以選歸於皇從孫右監門衛將軍世覃封武昌縣君

子男四人長曰令辟太子右內率府副率餘皆幼未賜名

夫人以嘉祐二年十一月丁未以疾卒享年三十有三權

厝於奉先佛寺以嘉祐五年十月乙酉葬於永安之原銘

曰

行之修學以明德施於內銘告諸冥

鞏縣志卷二十三 文徵一

三 經川圖書館刊

右監門衛將軍夫人東陽縣君鄭氏墓誌銘

歐陽修

夫人姓鄭氏曾祖誠贈定國軍節度使祖崇勳贈左屯衛

將軍父崇範內殿崇班夫人以選歸於皇從孫右監門衛

將軍世智封東陽縣君生子男三人長曰令唐太子右內

率府副率早卒次未名卒次令祈太子右內率府副率夫

人爲人孝謹節儉喜誦浮圖書至和元年八月戊戌以疾

卒享年十有九以嘉祐五年十月乙酉葬於永安之原銘

曰

儉以行其躬孝以事其親以是貽其子孫

右監門衛將軍夫人周氏墓誌銘

歐陽修

皇從孫右監門衛將軍世哲之夫人曰永安縣君周氏曾
祖景左領軍衛上將軍累贈尚書令祖瑩天平軍節度使
宣徽南院使父普西染院使夫人以慶歷五年選爲監門
之配勤孝柔仁克有婦道生一男曰太子右內率府率令
儇女三人皆幼夫人以嘉祐二年二月庚午以疾卒享年
二十有九五年十月乙酉葬於河南永安之原銘曰
山川旣佳日月惟吉惟永其安其藏其密

秦國大長公主墓誌銘

張方平

秦國大長公主仁宗皇帝第九女也母曰淑妃董氏嘉祐
四年四月二十五日誕生嘉祐初仁宗違裕淑妃奉侍勤
瘁帝心察而怜之眷遇甚渥故主愛亦隆五年封福安公
主八年英宗纂御進封康國長公主治平四年今上踐阼
加號鄭國大長公主閏三月二十三日薨年八歲主雖妙
齡地居尊屬在仁宗有兌女之寵於英宗處天妹之重今
上當太主之貴而太皇太后盡鞠育之慈皇太后敦諸姑
之好可謂生而極盛榮之至也主旣終三年之制復值大
行之恤性資純孝情深攀慕日課佛經閒或蔬饌積毀癯
瘠感疾遂侵三宮軫懷日就臨問親省醫劑奄然無瘳美
玉韜華明珠晦色琅函金簡應圖牒以暫來喬雲景星見

光靈而遽返中闈傷慟掖庭哀送四月二日敢塗於奉先
資福精舍上爲輟視朝五日追禭秦國大長公主秋八月
從英宗皇帝龍韞謁窆昭陵外域別用鹵簿儀物以從蓋
舊禮也有詔近臣刊辭樂石銘曰

月渚仙娥星潢帝女周美天妹漢尊太主初解文襟承禧
紫房穠華鳳彩秀色龍章素瑟未工玉簫方習黼幄愛隆
雲駟迴急三宮慈渥五陵神隰逝不可留吁嗟太早

皇叔祖推誠保順同德亮節崇仁守正佐運翊戴功
臣寧海平江等軍節度管内觀察處置隄堰橋道等
使開府儀同三司檢校太傅守太保兼中書令杭州

鞏縣志卷二十三 文徵一

三三 經川圖書館刊

大都督府長史使持節蘇州諸軍事蘇州刺史上柱
國襄陽郡王食邑一萬五千四百戶食實封五千戶
贈太師尚書令兼中書令追封定王墓誌銘

張方平

王諱允良字公彥太宗皇帝八子而吳恭肅王最幼尤寵
焉章聖緣先帝意友愛加厚久不就外郎故以大中祥符
六年生王於東宮母康國太夫人劉氏天禧四年先王爲
言能勝衣趨拜一命右千牛衛將軍方八歲越二年仁宗
踐阼遷大將軍舒州刺史天聖中始預朝參解將軍正授
泰州刺史俄除潁州團練使徙單州明道二年天下乂安

朝廷講稀闕之典劭農務本帝躬藉於千畝王預九推之位禮成覃慶遷鄭州防禦易蔡州陪祠南郊進安州觀察使久之改鎮國軍節度觀察留後慶歷元年景至大祀圓丘王備終獻陟降惟恪四年恭肅王捐宮寢仁宗深惟祖宗基統之重蓋具潭太祖之昭也潞許邢潤蘇華燕太宗之穆也至是薨謝無存者思盤維之重慮深長之本始議崇建戚藩以屏王室於是以華原郡王肇啟王封既而拜安國軍節度使皇祐二年冬祀明堂帝奉玉幣既交於上下神祇慨然嘉與天下均受靈貺推恩中外加中書門下平章事換鎮江軍節旄至和二年檢校司空領泰寧軍節

度嘉祐元年行恭謝之禮王陪祠登獻七年祐享太廟除開府儀同三司兼侍中彰信軍節度八年夏英宗纂御王以叔父之尊檢校太保兼中書令泰寧軍節度改封襄陽郡王治平四年宮車晏出今上踐阼王久苦末弱猶能力疾趨入盡號慕之哀真拜太保杭州太都督府長史寧海平江等軍節度哭而出疾遂篤尋有中詔俾朝朔望以優尊屬甫逾月而薨王姿表粹美氣質溫厚服寵四朝惟一心仁宗之仁周於萬物而仁之所施常自親始肆其眷待宗室恩禮隆密朝政之暇佳辰令節合族綴親醮於內朝如家人禮王於天屬至近行統而節和故被遇爲渥賜以

御筆飛白書王旣刻石以進則徧錫公卿近臣嘉顯之王好修威儀矜莊自喜燕居裕如也趨朝肅如也侍祠恪如也性寬易左右侍御小過失未嘗譴責甚者詰之亦怡而不厲久于其側者莫見愠色永嘉郡王王之仲弟也其子宗粹早孤王撫育如所生王旣薨宗粹請服三年議者因以嘉王之仁心長者頗好篇詠感物吟諷時有風味佳句俸賜厚矣未嘗有蓄也府藏出入未嘗披其籍亦不問其在亡國朝之制不屬宗室以吏事優其祿秩異其寵章列邸京師以奉朝請爲選儒學士切磋講習廣之道藝而已所以篤親親之恩不使任責惇敘糾合別於庶姓者也然

間有韞才業抱器慮者不偕于用齋志以歿故執冊者無得而書不然屬籍之功名豈直漢唐之比盛歟治平四年三月二十六日甲戌薨享年五十有五訃聞天子趣駕欲往臨哭有司言大行梓宮在殯而止輟視朝立日成服於苑中文武班慰於崇正殿門贈太師尙書令兼中書令追封定王閏三月甲午菴塗於正寢之西楹八月癸酉英宗龍輅西引從葬於河南永安先王之塋英國夫人張氏祔焉夫人橫海軍節度使贈太師尙書令美之曾孫女果州團練使士宣之女子八人宗絳右龍武軍大將軍郴州團練使宗蘭右武衛大將軍台州刺史宗史宗劼宗易右監

門衛將軍餘早世女八人曰金堂縣主普寧嘉興延安安
定同安普寧郡君皆已有適其一幼孫七人仲竣右監門
率府率早世仲蒼右監門率府率餘皆幼遠日有期奉詔
紀實銘曰

神宗之穆燕爲寵王恭肅之愛亦鍾襄陽體自天人虎蔚
龍章肆得靈稟敦和以莊勝衣奉朝雅有嘉聞寵章麗澤
康侯以晉迺啟華原荐更四鎮淑旂綏章兼縉相印迨事
四朝屬尊位崇歷長三省訖登上公并帥全吳兩藩之雄
別建赤社江漢是封有宋開基百年光大極盛積隆德商
無外重仁累慈恩光治內王生得辰與國同泰帝坐路朝
一日萬幾昧爽丕顯居安思危王居深宮以燕以禧五十
五年始終盛時王享多福四朝盛德亦惟淑慎錫汝保極
嵩洛佳原五陵接域往從先王返此幽窆

鞏縣志卷二十三 文徵一

三
經川圖書館刊

皇從弟故推誠保順翊戴功臣安靜軍節度使梓州
管內觀察處置等使金紫光祿大夫檢校尚書右僕
射使持節梓州諸軍事梓州刺使兼御史大夫上柱
國天水郡開國公食邑六千六百戶食實封二千一
百戶贈太尉追封永嘉郡王墓誌銘 張方平

王諱允迪字德謨燕恭肅王之第五子太宗皇帝諸王恭
肅最幼鍾愛焉章聖嗣服緣先帝意加親寵故久不就外

邴大中祥符甲寅歲生王於東宮天禧四年遇承天節始
賜名一命爲右千牛衛將軍今上踐阼推恩內外褒進戚
藩以翼王室除大將軍領和州刺史久之罷將軍改崇州
俄拜唐州團練使明道元年宸居落成肆大旨徙濟州躬
藉千畝王預九推之位禮成均慶遷汝州防禦使進靜難
軍留後慶歷四年制授安靜軍節度使蓋恭肅王嘗領是
鎮而王繼焉宗藩榮之是歲先王捐宮寢聖上慈仁誠孝
至性自然寅畏天地虔恭祖考惇睦族屬以御於家邦嘗
欲以是風天下納民大順恭肅之薨也以叔父之重悼恤
尤深而王執喪有不及禮者降授右監門衛大將軍克自

鞏縣志卷二十三 文徵一

三 經川圖書館刊

修省循禮謹度尋改密州觀察使六年復安靜旄鉞王素
康盛至是感疾良■中貴人挾上醫診視內出湯金劑以
賜撫訊相及於路疾遂革慶歷八年三月己未夜漏十刻
以不起聞享年三十有五上聞震悼輦如其邸臨哭之廢
朝五日丁巳上成服苑中文武班慰於崇政門襪以太尉
章紱追封永嘉郡王凡賻賜率加等焉太常節諡曰思恪
詔大鴻臚持節典喪事四月癸酉菽塗於寢易官以窆事
令龜先遠日維六月癸酉吉未引紼宣徽北院使李昭亮
辭赴三城故事置餞酒于垂拱殿以王在殯爲之徹樂五
月甲寅具鹵簿鼓吹麾幢旄節導輜以西葬河南之永安

安陸郡夫人張氏耐焉夫人德象婉嘉壺闈之範載命不
淑方華而頌繼室昭國夫人錢氏忠懿王之孫女志尙清
淨而安其家懇請遜於洞真宮遂賜道士服名曰修真號
和正大師子四人曰宗粹右監門率府副率三皆天逝女
七人長早卒贈江華郡君次並在室王姿采秀發氣志果
勁性開敏豁如也涉獵書史略通大義留思篇詠風體爾
雅曉音律善射命中得和容之妙國朝之制不屬宗室以
史事悉留京師以奉朝請若永嘉之果以敏使之從政亦
足以發已若夫被化麟趾承華棣萼靈長憑厚體聯上帝
之孫顯重崇高族系天王之弟昌辰累洽丁慶祚以同安

鞏縣志卷二十三 文徵一

三 經川圖書館刊

聖度廣容靡嚴顏之懷懼宴寧譽處生榮歿哀方之前朝
王享備矣百福具有不至者年天實命之何嗟及矣臣職
在史觀且司宗籍承認詔誤職敢不直書銘曰
許許梓璋蜀劍之東先王相攸實啟榮封帝念叔父建爾
仲子纘其節旄俾多受祉仙源懿親誥誥振振祖宗諸孫
其在五人亮心舜度仁覆寰宇豈其本支不貴以富胡然
乎天不與之年奄違昌時而歸幽泉吉仗森列悲笳慘絕
有祿者車挽紼晨發嵩洛之陽三陵相望體魄就寧下從
先王

樂全集係據鈔本轉錄如此篇之安靜軍應爲潼川府

之靜安軍節度潼川府本梓州也銘詞之許許梓壇句
壇是潼之誤而許許二字不得其解

左武衛大將軍沂州防禦使贈崇信軍節度觀察留
後漢東郡公墓誌銘

張方平

平陽懿恭王子十七人漢東於伯仲爲第六母曰崇國夫
人王氏而漢東乃會稽縣太君黃氏所出公諱宗回字晞
聖生九歲賜名授官右侍禁景祐中會朝廷以環衛敘宗
子於是以東頭供奉官除左千牛衛將軍累遷至左武衛
大將軍沂州防禦使年五十以疾終時治平三年二月戊
申也訃聞輟朝一日告贈崇信軍節度觀察留後追封漢

鞏縣志卷二十三 文徵一

三 經川圖書館刊

東郡公四月乙酉權厝于奉先資福佛舍四年八月癸酉
從英宗龍駕往耐先王之塋累階金紫光祿大夫檢校右
散騎常侍兼官御史大夫勳上柱國爵開國公食邑三千
七百戶真食七百戶漢東儀度峻整好學隸書曉音律善
騎射平居寡言莊色儼如也有至性年十一喪平陽號踊
不自勝若成人者及會稽歿毀墓癰瘡宗族稱其孝晚年
篤信釋法不以世累縈其心賓祭內外之事屬于其配忘
懷委順以遊乎方之外夫音伎之樂玩巧之好乃富貴之
地耳目之所常湛沒者是之弗由而獨遠離苦集之途庶
幾真常之境推其所尙天下一致而百慮同歸於爲善而

已夫人隴西郡君李氏克勤內則恭順宜家公之所以得不爲塵世所嬰以夫人幹家之蠱有餘裕也子二人仲革仲洽並以將軍領稚州昌州刺史皆端固修立女三人長適右侍禁李彥明次適左侍禁倪良嗣次尙幼孫三人士縱右千牛衛將軍士憑士鉦皆右監門率府率孫八人俱幼銘曰

孝哉漢東至性天得永懷二人哀哀罔極薄諸可欲忘懷世累將超於彼自歸覺地知此如幼孰爲延促往從先王離嵩之麓

宗室金紫光祿大夫右屯衛將軍檢校太子賓客兼

鞏縣志卷二十三

文徵一

罕

經川圖書館刊

御史大夫騎都尉天水縣開國子食邑六百戶贈穎

州防禦使汝陰侯墓誌銘

張方平

汝陰諱宗育字德之太師尙書令潞恭憲王之孫安遠軍節度使密國公允言之子源深流光胄自太宗國家篤親親之恩睦於公族天聖二年始賜名以右侍禁入備內朝稍遷東頭供奉今上躬擊萬機超拜內殿承制兼視賓護副相之秩尋屬園壇類帝陟配文考乃眷肺腑便蕃渥典於是進加右屯衛將軍賜階金紫光祿大夫列爵五等衍食采地六百戶不幸感疾才三十而歿時康定辛巳秋七月也訃奏上聞震悼有加申命內司賓內謁者臨弔治喪

事繼以潁州防禦汝陰侯印紱權厝普濟積藍後三年甲申夏四月從燕恭惠王之鹵簿往窆河南永安縣實祔先王之塋惟汝陰資性溫厚涉詩書點翰有楷法閒喜武戲尤精射御方將承寵嘉輔熙隆而降齡弗修其命也夫夫入濮陽吳氏故領軍衛將軍元慶之女封本郡君勳門戚里姿德兼茂子三人長曰仲堯右內率府副率餘皆天闕一女亦不育有詔掖垣俾議幽窆銘曰

汝陰綽綽器概宏博以善爲樂襲寵軒綏敷庭侍祠在宗有儀當鍾遐祉森曉麟趾收神遽已鞏樹伊流陂陀新丘
琢石傳休

鞏縣志卷二十三

文徵一

三

經川圖書館刊

宗室贈右屯衛大將軍仲考墓誌銘 張方平

仲考字晞尹魏恭憲王之曾孫平陽懿恭王之孫右龍武大將軍丹州防禦使宗產之子皇祐三年四月生至和二年始賜名授太子右內率府副率嘉祐八年英宗皇帝踐阼改右監門率府率治平四年今上卽位遷右千牛衛將軍五月甲申以疾卒享年一十有七訃聞輟視朝一日贈右屯衛大將軍權厝普濟佛舍八月癸酉從大行靈駕葬河南永安以祔先王之塋累階金紫光祿大夫勳上護軍爵開國子食邑六百戶娶王氏一女惟屯衛幼而岐嶷長而嚮善方朝廷設官立學以導宗子於德義而不得遜志

進修以成其之才之性爲可傷矣觀其臨終之辭與父兄相反覆而愛順之心尤足悲者矣銘曰

幼女稚妻常情在茲逝將去汝云胡不悲此愛能輕是有剛節獨於父兄咽不忍絕乃其性資知義所存雖不享年斯明不昏

皇姪孫銀青光祿大夫檢校國子祭酒行右監門率

府率兼御史大夫輕車都尉贈領軍衛將軍仲郢墓

誌銘

領軍諱仲郢謹稽屬籍惟太宗皇帝之元子曰潞恭憲王生密國公允言密公生祁國公宗說祁公男子二十三

鞏縣志卷二十三 文徵一

三

經川圖書館刊

女子二十五人爲領軍之兄姊者二人焉蓋流潤星潢擢華月幹慶基憑厚昌緒隆遠矣領軍姿貌端秀性稟明悟始就外傳屹然佩鞞有成人之志嘗侍上射苑中攝弓操矢得襄尺剡注之體屢中正鵠賜賚加等復能留好文史吟詠自娛尤喜篆籀二王歐陽筆法猶達其勢孝友恭順本諸其衷事親婉以從令處子舍莫有失愛者入朝廷繇賓贊而威儀儼如景祐三年始賜名授太子右內率府副率慶歷七年四月二日感疾而卒享年二十三皇帝以諸孫之悼輟垂拱朝一日禋以領軍衛將軍印綬殯于奉天精舍八年六月六日從永嘉郡王之鹵簿往窆永安塋域

禮也娶郭氏三子長曰某率府率次曰某率府副率季未
名四女並在室噫稟生如此其粹也憑慶如此其隆也降
年不永是以祿位器志皆未之究已有詔史官爲之識銘
曰
神宗之穆旣蕃旣昌邗公之子誥誥且良洵美領軍翹然
而秀貴可跼待不俾以壽崧高之麓天啟佳城憲園耐窶
體魄維寧

宗室故銀青光祿大夫檢校國子祭酒行太子右司
禦率府率兼殿中侍御史騎都尉世襲墓誌銘

張方平

宗室吳潭二邗太祖皇帝之穆也潭康惠王德芳生昭信
軍節度使兼侍中英國公維憲英國生金州觀察使從郁
司禦蓋金州之第三子諱世褒字仲華以真宗朝天禧已
未生明道癸酉始賜名補右班殿直預內朝尋改右侍禁
景祐乙亥遷階銀支行太子右司禦率府率視秩國子祭
酒寶元中兼殿中侍御史賜勳騎都尉慶歷元年十二月
十三日遘疾終于邸院春秋二十有三權塋于普濟佛舍
越三年歲在甲申夏四月癸卯從燕恭惠王鹵簿葬于洛
陽永安大塋夫人安氏無子司禦方雅信厚公族之秀幼
知好學涉通諸經善行草書尤好虞褚筆法略得其妙近

事諸皇族鮮出補外官悉留京師亦不釐務爲選儒學官切磋講習外奉朝請而已此朝廷親親之義敦睦糾合所以別於庶姓不責以事然閒有縕才慮抱器識者不偕于用齋志就歿故執册者無得而書焉銘曰

太祖之穆在潭啟封君其會孫源深基隆雅重者性粹厚者志言用與才則未嘗試蕭蕭馬鳴悠悠素旌往從先王永安之塋

徐國太夫人墓誌銘

張方平

禮惟大昏之重以其合二姓之好繼萬世之本也矧皇胄宗子天家之貴其聘納之選非冠冕德門忠孝之族孰當

鞏縣志卷二十三

文徵一

四

經川圖書館刊

焉潭康惠王之仲子故侍中英國公諱惟憲之夫人曰和氏王考諱凝相五代晉位至右僕射太師尙書令考諱嶸殿中丞母彭城縣君劉氏夫人體質閑淑德音有度旣就壺教稱賢嫺黨祥符癸丑歲嬪于王家事尊撫卑夙夜匪懈寬和敦約動循禮法丙辰歲英公捐館晝哭過哀常好文翰通曉音律是後不復治習稱未亡人誦貝葉書奉金僊之教諸孤幼稚均養如一熒居二十年上下無間言者乾興初封汝南郡君明道二年進莒國夫人慶歷丁亥孟春感疾羸薊上遣中貴人挾醫診視諸子益購高手療之莫瘳以七月二十一日薨于寢享年五十有六追封徐國

太夫人上聞而悼之賻恤加等遣內人省其室詔使護喪事爲菽塗奉先精舍戊子六月六日歸祔英公于永安塋禮也男子四人長從郁終于金州觀察使次從式左千牛衛大將軍彭州刺史次從湜左千牛衛大將軍循州刺史次從賁右監門衛大將軍女十二人長早卒次封齊安宣城懷德廣樂晉安安定高平仁壽郡君諸季早夭嗚呼夫人其爲女也靜而婉可謂有形管之法其爲婦也順而正可謂有采蘋之行其爲母也慈以均可謂有鵲巢之德用能節義著于宗戚恩禮厚于宸眷史臣執簡宜有識矣銘曰

展矣英公宗之彥兮猗歟夫人邦之媛兮自我于歸上下宜之樂只君子福履綏之云胡不淑公不偕老我逾中身則已壽考云胡多慶子皆克孝承顏無違服我慈教自公忽兮我心缺兮半甲子兮從于穴兮

宗室右武衛大將軍黃州刺史令稼夫人壽昌縣君

李氏墓誌銘

張方平

壽昌縣君李氏故右監門衛將軍言之孫故右侍禁祺之女于今皇太后爲外族治平三年八月歸于右武衛大將軍黃州刺史令稼武衛迺冀康孝王惟吉之曾孫廬州觀察使廬江侯守度之孫舒州刺史世括之子壽昌旣歸事

舅姑如父母事其夫甚恭愿和順之性出于自然每黃州之講學也承奉尤祇勤輒躬饌以待蓋喜其良之遜志自修也且曰富貴而能爲善吾心樂哉蓋知內助之益者歟四年五月辛丑以疾終享年十有九六月己酉殯于普濟佛舍八月從英宗皇帝靈駕葬河南永安女一人始育黃州宗室之秀而壽昌才德婉淑宜與之偕老而遽然以逝亦可悲矣銘曰

宗室太子右司禦率府率宗彥夫人張氏墓誌銘

鞏縣志卷二十三

文徵一

張方平

張方平

夫人姓張氏祖遵以材勞更勇爵歿贈邠州觀察使父文慶左班殿直夫人生而淑麗聞諸姻黨時平陽懿恭王少子今司禦率府率宗彥遴求佳匹協幹宗室允矣邦媛宜于吉卜乃展禽帛之聘歸于邸第執笄奠菜婉如肅如懿恭宗藩之望胄緒昌衍夫人協和娣姒雅有禮法褒封未逮穠華遽零凡好合八年以慶歷壬午七月旣望終于內寢春秋二十四越月塗殯資福精舍甲申孟夏歸窆洛陽永安從邦族之大塋順也三男長仲寂次仲向並太子右內率府副率一未名三女詞臣被旨銘其墓曰

懿士女兮洵美且媿嬪天孫兮弗偕遐年曉風急兮卷祥雲秋霜繁兮摧芳荃伊之淚兮嵩之麓魂兮歸來安幽阡

右監門衛大將軍仲炎夫人秀容縣君李氏墓誌銘

張方平

秀容縣君李氏章懿皇后之姪女也曾祖延嗣尚書令吳國公祖仁德尚書令秦國公考用和中書令安定郡王章懿皇后誕生仁宗皇帝以外家之重闕裔光大秀容幼聰惠今慈壽太皇太后養于閣中仁宗選宗族之秀以歸于右監門衛大將軍仲炎有子五人士良士屏皆終于內率府副率次先亡二人幼未名女一人早夭秀容以貴戚之

鞏縣志卷二十三

文徵一

聖

經川圖書館刊

後爲宗室婦盥櫛事舅姑謹恪嚴翼如出寒素無弛怠之意治平四年三月甲戌以疾終年二十有四權厝奉先佛舍八月癸酉從英宗皇帝靈駕往葬于河南永安銘曰善事舅姑從夫以順貴出后家雅循箴訓云何先春凋此芳薜二子肯堂尙承淑問

左驍衛大將軍世諡夫人仁壽縣君安氏墓誌銘

張方平

仁壽縣君安氏贈左驍衛大將軍世諡之配祖習解州防禦考惟演東頭供奉官十有四歲而歸驍衛驍衛纓冠捐館仁壽奉姑清河郡夫人張氏婦道甚備供養勤恪未嘗

不適其意治平二年六月辛卯卒年三十有七四年八月英宗靈駕西引從窆於永安以耐其夫之塋子一人令業右監門率府率早世仁壽既傷其夫而哀其姑又悼其子于是口不茹葷手不釋佛書痛自勉約如是積年竟先其姑而亡可悲也已銘曰

無夫何儀無子何依苦志靡宅之死不違勤勞瘁劬奉承其姑二紀一心之死不渝春露曷晞秋華易萎從夫違姑姑情獨悲

宗室右監門率府副率仲甫夫人魏氏墓誌銘

張方平

夫人姓魏氏曾祖仁浦追封秦王祖咸熙累贈工部尙書父昭文西上閣門使封州刺史秦王國初執政勳在王府故夫人伯祖保平軍節度使同中書門下平章事鄆國公咸信尙太祖皇帝女許國恭諱大長公主遂爲貴戚閭閻益熾夫人年十七有行潞邸好合五年室家相宜以慶曆甲申六月丁卯云胡不淑奄就大夜享年二十有一男三人長某右監門率府率餘未名夫人資儀秀靜性稟惠淑鑿絲組繡曲盡工巧事父母孝事舅姑順事夫有禮遇娣姒謙以和撫下恩意甚至生大族歸皇族不驕不忌亦婦道之難也初厝于普濟佛舍五年四月二十八日從潤邸

楚國太夫人靈仗歸葬永安大塋宗室之尙制也有詔詞
臣俾識幽窆銘曰

猗惟夫人貴戚之生宗子之嬪逮日之吉歸以翟裼庶宜
爾室胡然妙齡電泡不停蕙蘭摧馨柏城鬱鬱泉深土實
國之豐畢丹旒素輿靈其就途從先王口

宗室之尙制也尙字疑有訛銘詞末句闕一字

右清道率府率世顯夫人高氏墓誌銘

張方平

夫人高氏祖瓊以才武典禁兵領忠武軍節度使父繼隆
引進使陵州團練使母金華縣君呂氏夫人生而美秀性

鞏縣志卷二十三

文徵一

吳

經川圖書館刊

且明慧鬢絲箴管曲盡工巧絃篁音律雅通其妙溫靜莊
肅天資有裕吳懿王諸孫右清道率府率世顯方求淑媛
以主內治聞夫人之懿因問名而卜之吉遂納幣贄雁以
慶歷丙戌十一月歸于吳邸既祭于禰室家甚宜入謁中
禁儀容有度接諸宗黨莫不治比結縵暮歲載震彌月方
緩帶以爲喜遽收華而早謝口口十月五日卒于燕寢哀
哉若人之不淑始十有七歲矣厝于奉先精舍戊子六月
往窆河南永安縣之大塋一子曰令典率府副率噫以清
道之宗戚近屬以夫人之室家令範宜夫膺魚軒象服之
寵享鵲巢螽斯之慶琴瑟偕樂福壽相終而摧芳先秋淪

精長夜吁嗟乎彼蒼何賦與之獨嗇也銘曰
彼姝者子溫且惠兮旣笄有行合嘉配兮謂克享年福祿
萃兮祥煙彩霞遽披沫兮依然手澤在鞶帨兮揚且之哲
悅相對兮翩翩者旌車素邁兮鏤石紀文納泉隧兮

皇第八女追封韓國公主石記文

張方平

慶歷紀年龍集作噩孟夏二十五日辛亥皇第八女齊國
公主薨出于都城西普濟佛舍以須卽遠宸衷愴悼有詔
追封于韓再不視垂拱朝甲寅爲舉哀于後苑羣臣敘班
慰于崇政殿門之外時皇族楚國太夫人之喪歸耐澗恭
靖王之兆故因其儀仗載塋周以駟車五月丁卯葬諸永

鞏縣志卷二十三

文徵一

率

經川圖書館刊

安陵園本朝之故典也公主以癸未季冬十日實啟禡衣
之慶生而明秀自然溫清每省中建道場聞梵唄鐃磬之
音輒有悅色以故嘗依浮圖法號爲保慈崇祐大師及是
疾良美乃下制改封于鄧再進大國于齊噫稟和天粹託
體帝家以鍾念于淵慈故荐膺于寵數胡不遐壽永享多
福早歲逝矣彼蒼何哉不歸兜率之宮親承受記必向迦
維之國遂復下生被旨譔文用識幽窆謹記

故鄆國公主石記文

張方平

公主今皇帝之息女母曰侍御馮氏以慶歷二年六月二
日生三年八月十八日卒□□于奉先佛舍初宮闈叢慶

荐啟紡塼之吉而公主于諸女行第五韶穎明秀瓊膚紺髮真天人之相方且詔有司條西漢之制以疏脂沐酌開元之典以錫嘉號制未及下雨淫邁癘奄至不淑宸衷眷悼乃有鄆國之贈國朝之故自帝子下逮諸宗室凡未封爵而殤雖追貴一品不專舉仗衛及是燕恭惠王之鹵簿將陪葬于永熙故公主從焉載以輶車大鴻臚持節護行以甲申孟夏癸卯藏于莊懿太后之陵域不封樹從舊制也臣某載筆以司宗譜承詔譔著得詳錄云謹記

宗室銀青光祿大夫檢校國子祭酒行太子右內率府副率兼監察御史武騎尉仲產石記文

張方平

皇姪右屯衛將軍宗迴之第四子曰仲產曾祖潞恭憲王祖贈安遠軍節度使密國公允言母曰河南縣君梁氏以康定辛巳十月始育慶歷壬午春三月賜名一命爲銀青光祿大夫檢校國子祭酒行太子右內率府副率兼監察御史武騎尉是歲十一月卒後二年夏四月癸卯舉而藏于洛之永安大塋國家錫羨詒謀宗姓蕃昌故尊者茅土以胙之卑者爵命以寵之枝葉扶疎本根深固羨乎哉隆且盛矣產也不幸而夭逝亦命而已矣謹記

宗室左監門衛大將軍世滋故長男太子右監門率

府率令輯石記文

張方平

令輯字君瑞冀康孝王之曾孫贈陳州觀察使追封淮陽侯守約之孫左監門衛大將軍世滋之子母曰長樂縣君王氏于皇上爲姪曾孫慶歷四年正月乙酉生于邸第俄值誕節恩命之名錄爲太子右內率府副率賜階銀艾檢校上庠祭酒憲銜兼監察勳武騎尉八月遷右監門率府率是歲仲冬親郊圓丘均慶宗室加散官殿中改勳騎都尉越五年五月旣望日而天甫及二歲權厝于普安佛舍夏四月坎而藏于永安大塋康孝王實太祖皇帝之孫德厚流光本支蕃衍矧惟睿聖親親之篤故殤子未違襁抱而寵錫數加賦命不遐奄違昭世哀哉謹記

宗室右監門率府率仲郢第三男石記文

張方平

宗室右監門率府率仲郢之第三男以慶歷三年八月生五年三月六日夭歿贈安遠軍節度使密國公允言之曾孫左千牛衛大將軍嘉州刺史祁國公宗說之孫也母曰郭夫人密國蓋潞恭憲王之次子其系出于太宗皇帝本朝典故凡宗子賜之名則加以官若殤子者洒流璿源分華金枝未再周星遽隨逝水一命不及非命也夫初厝于普濟佛舍卽以夏五月十二日掩于永安之域從舊制也

謹記

宗室右千牛衛大將軍宗訥第四男石記文

張方平

殤子潞恭憲王曾孫贈鎮江軍節度使兼侍中郇國公允成之孫左千牛衛大將軍宗訥之第四子母曰長樂郡君賈氏康定二年辛巳七月十六日載誕慶歷壬午七月十五日夭卒生甫周歲奪于襁抱未王命未錫名故無紀者初火于永寧佛舍越甲申孟夏癸卯坎而藏于永安大塋國家源流深長本支蕃衍諸宗室子垂髫佐餽卽就師誨教之方名數目稍肄簡口拜官賦祿矣故皇屬不患爵位惟不享年未如之何已茲殤子之所可悼也謹記

鞏縣志卷二十三 文徵一

三

經川圖書館刊

宗室故贈潁州防禦使汝陰侯宗育第二男石記文

張方平

殤子潞恭憲王曾孫贈安遠軍節度使密國公允言之孫贈潁州防禦使汝陰侯宗育之第二子母濮陽郡君吳氏以康定辛巳十一月載誕慶歷壬午八月夭卒生未周星奪于襁抱未王命未錫名故無紀者初火于薦嚴佛舍越甲申孟夏從燕恭惠王葬仗藏于永安大塋吉壤廣原諸宗室之收宅使逝者而可作殤子且保于父祖矣又何愴焉謹記

宗室右屯衛將軍宗迴第五子石記文

張方平

皇室右屯衛將軍宗迴其第五子以慶歷壬午閏九月生
生旬日而歿蓋太師尙書令潞恭憲王曾孫贈安遠軍節
度使密國公允言之孫母曰河南縣君梁氏初火于薦嚴
佛舍甲申四月舉而藏于永安大塋國家推親親之恩雖
始生之嬰孩而莫或遺也其于敦睦收卹之道亦云至矣

謹記

故銀青光祿大夫檢校國子祭酒右監門率府率兼
侍御史上騎都尉仲涵石記文
張方平

鞏縣志卷二十三 文徵一

五
經川圖書館刊

故右監門率府率諱仲涵左監門衛大將軍宗懿之長子
平陽懿恭王孫潞恭憲王之曾孫也母中山郡君杜氏慶
歷辛巳三月十二日生三月而賜名授太子右內率府副
率兼監察御史是歲郊祀慶成加恩殿中侍御史四年遷
今官其年復以郊祀加恩改兼侍御史七年四月二十日
卒于邸遂殯于奉先精舍八年六月六日徙窆于河南永
安縣之大塋率府資性孝謹不好戲弄勝衣就傅學方甲
書數墨筆字蹟已中楷法頗習丹青之藝亦有可觀方將
討論文史趨爲善之樂賦命不淑旣齟而殞其可哀也已

謹記

左監門衛大將軍宗楷第八男石記文

張方平

宗室無服之殤曰左監門衛大將軍宗楷之第八子母陳留郡君吳氏以慶歷丙戌三月十二日生舉以文襟粲然珠潔雍樹顧復免于水火以丁亥七月十三日卒哀哉未名故未之命也其天之遽已擯而焚之藏于奉先精舍戊子六月六日葬永嘉郡王于永安大塋殤子從與瘞焉國家親親廣愛以風天下惟是飾終之典尤爲纖悉又詔詞臣爲之識納諸幽坎厚之至也謹記

宗室太子右內率府副率仲郢長女石記文

鞏縣志卷二十三

文徵一

五

經川圖書館刊

張方平

潞恭憲王曾孫贈安遠軍節度使密國公允言之孫左千牛衛大將軍宗說之子曰右內率府副率仲郢其耦汾陽郭氏以康定二年八月始生一女凡二歲感疾而殞卽於是日從浮屠氏荼毘法而置之法濟精舍後二歲歲在甲申夏四月舉而藏于伊南之大塋夫古所謂殤者不以成人之禮舉之也本朝惇敘協和軫懷於天奪所以廣慈愛之道而立教于天下也已謹記

祁國公宗說第六女石記文

張方平

慶歷八年六月六日葬永嘉郡王于河南府永安大塋故

事凡匱之厝殯者雖不成殤舉以是日窆若瘞焉今殤女之封用茲典也潞恭憲王之曾孫贈安遠軍節度使密國公允言之孫千牛衛大將軍祁國公宗說清河郡君張氏之第六女也質秀體淑美哉其容也柔聲下氣嘉哉其言也箴管輅悅敏哉其功也恭孝謹順懿哉其德也不幸感疹十一歲而卒蓋慶歷七年二月十五日也笄纓之期甫及脂澤之田未封蘭始薰而霜彫珠將圓而月缺故宗黨所以悼戚之尤甚也已謹記

宗室右屯衛將軍宗嚴第七女石記文

張方平

皇從姪右屯衛將軍宗嚴之第七女以慶歷辛巳十一月誕育壬辰八月夭逝火于薦嚴佛舍甲申孟夏癸卯舉而藏諸永安大塋殤女潞恭憲王曾孫贈侍中郇國公允成之孫生未周星奪于襁抱珠碎掌上蘭摧庭中父兮母兮惜憫何及往安幽坎尚慰二人謹記

宗室右屯衛將軍宗嚴第五女石記文

張方平

慶歷甲申舉諸宗室暨諸小喪從燕恭惠王以西而殤女在焉女潞恭憲王曾孫贈鎮江軍節度使兼侍中郇國公允成之孫右屯衛將軍宗嚴之第五女母曰長樂郡君潘

氏寶元己卯十月誕育慶歷壬午閏九月三日邁疾夭卒年四歲殤女之始免于懷垂髻佩燧知承姆教習于盤絲濬發其源本銀潢之一派華而不秀摧玉樹于先春初火于薦嚴精藍及此掩于永安之域實甲申孟夏之癸卯也髮髯弱魂往安幽埴謹記

安德軍節度使華原郡王允良第九女石記文

張方平

華原郡王第九女母英國夫人張氏慶歷乙酉歲六月設輓于門右且示有紡事焉負以文襟舉之于寢粹然而玉潔粲然而珠媚旣孩則顧指戲笑裕如也不幸病悸先朝露以晞蓋丙戌歲之七月也遂厝櫛于廣福精舍慶歷八年從父永嘉王薨鴻臚護喪以六月六日葬永安原女亦從而瘞焉華原燕恭肅王之冢嗣實出太宗皇帝謹記

左龍武衛大將軍信州團練使安國公從古第四女

道娘石記文

張方平

宗室左龍武衛大將軍信州團練使安國公從古之第四女道娘字幼真母京兆郡君宋氏以明道癸酉歲有衣褐之喜幼真天質端秀異于羣兒性復穎悟所學輒善組紉餘力尤好筆札日事薰祓誦金仙書慕習其教侍安國公京兆君旁惟顏色所嚮而俯仰承接于婉若方且總羈就

筭卜歸良族容纓未佩膏肓感疾上遣太醫高手以視而藥石不效慶歷丁亥四月十一日卒年十有五矧才德既顯惟有待而發之惜哉天奪其壽故諸宗黨所以悼痛甚焉上爲嗟惻祿以冠帔將幣有加卽厝于奉先禪院乃以慶歷戊子六月六日附窆曾祖渾康惠王之園兆謹記

寒食節起居永定陵宣祖諸陵等處表

王安石

伏以榆火戒時柏城在望薦豆籩之新物弗獲躬親象几席之平居實存館御蠲烝有舊絜慕無窮

寒食節起居諸陵昭憲等諸后表

王安石

鞏縣志卷二十三

文徵一

五

經川圖書館刊

伏以桐華伊始火令載嚴獲嗣慶圖仰蒙慈芘追淑靈而莫逮歷時序以增思

中元節三陵起居諸后表

王安石

伏以素秋伊始華月既盈物御氣以夷傷心感時而悽愴伏惟尊謚皇后惠風無斃慈範有詒猥以眇冲仰承慶裕瞻幽靈之所宅結永慕之至懷

八月一日永昭陵旦表

王安石

伏以暑往御時宵中應律載班秋朔申薦廟嘗伏惟尊謚皇帝體道成乾施仁應物率土方涵於聖化賓天遽愴於神遊追龍駕於空衢莫知所稅瞻烏耘之新隴但有至懷

十月一日永昭陵奏告仁宗皇帝旦表

王安石

伏以月乘該門時御閉藏歲回薄以將更物盛多而可享
恭惟尊謚皇帝德符穹昊功濟黎元方求大隗之居遂兆
成周之葬光靈在望感惻交懷

十月一日起居永昭陵等處諸陵表 王安石

伏以日星隨旋歲月從邁物更收攬之候人積悽愴之懷
恭惟尊謚皇帝躬睿廣之材撫休明之運協九皇而高世
追三后之在天方以眇躬嗣膺神器想威靈之如在感氣
序以增欷

鞏縣志卷二十三 文徵一 五

經川圖書館刊

十月一日起居永安陵等處諸后陵表

王安石

伏以哀恫在疚未盡通喪弦晦如流載更良月恭維尊謚
皇后降釐媯汭播美河洲著慈範以如存流徽音而可想
邇陵永望感節深追

冬至節上諸陵表 王安石

伏以節復黃宮晷移北陸物驗土灰之應官修雲物之占
恭惟尊號皇帝睿廣應期休明作乂收功既往垂範方來
感時序之變流想威靈而慘結

冬至節上諸皇后陵表 王安石

伏以四時交御一氣潛萌慶雖屬於履長悲豈忘於追慕
恭惟尊諡皇后升儷尊極協成修明德範有詒方美王睢
之摯容衣不悶尙瞻禴翟之華永想光靈詎勝摧感

中元節起居諸陵表

王安石

伏以夷則御辰商聲甫協望舒戒節陰魄既盈伏惟尊號
皇帝道邁往初恩涵品彙於屬車之所御有原廟之舊儀
方此戒寒豈勝追遠

右武衛大將軍黎州刺史世岳故妻安喜縣君李氏

墓誌銘

王安石

安喜縣君李氏連州刺史贈太師中書令尙書令繼昌之

鞏縣志卷二十三

文徵一

李

經川圖書館刊

曾孫鎮國軍節度使駙馬都尉贈太師中書尙書令秦國
文和公遵勉之孫供備庫使贈安武軍節度使端憲之子
是爲皇族右武衛大將軍黎州刺史世岳之妻溫柔靜恭
內外親稱之治平四年年二十五以十一月二十四日感
疾死至二年二月十七日葬河南府永安縣銘曰
懿懿獻穆下歸以祉有來肅雍施及孫子厥嬪皇宗莫醜
具美噫乎終藏兆此新里

宋贈保慶軍節度觀察留後追封東陽郡公宗辯墓

誌銘

王安石

公諱宗辯字慎微祖諱元佐是爲魏恭憲王考諱允升太

師平陽郡王諡曰恭懿公平陽第十三子生數歲而平陽
薨事母孝友于兄弟好讀書不舍晝夜常獻所爲文得試
學士院兄弟四人皆中優等遷官而仁宗遇公甚寵嘗親
書近親才賢好文博古八字賜之公旣好書又嗜醫方所
蓄方甚衆每公自治藥以振人之疾其惻隱不倦蓋天性
也以熙寧元年七月己卯終於睦親北宅享年四十六官
至右衛大將軍金州防禦使爵天水郡開國公食邑三千
戶食實封五百戶贈保寧軍節度觀察留後追封東陽郡
公夫人李氏封德安郡君贈尙書中書令漢瓊之孫子男
十五人仲富右內率府副率仲尋右羽林軍大將軍黎州
團練使仲綰右武衛大將軍雅州刺史仲瑄右武衛大將
軍彭州刺使仲緘右千牛衛將軍仲沂右監門率府率仲
琨右內率府副率仲富前公卒餘亦皆蚤死女子十九人
嫁者四人未嫁而死者九人餘尙幼也二年二月十七日
葬河南永安縣銘曰

猗歟賢公蕃此皇國耀其藻章以資明德能不外勸維家
之飭厥承詵詵餽我無射如何不怡遂永窆窆
贈虔州觀察使追封南康侯仲行墓誌銘

王安石

公諱仲行字德之故婺州觀察使諱宗迴之子贈節度使

同中書門下平章事蔡國公諱允言之孫魏王諱元佐之曾孫母曰齊安郡君梁氏慶歷四年賜名除太子右衛率府率右監門衛大將軍爵天水郡開國侯食邑一千三百戶年二十二以治平四年八月二十九日卒贈虔州觀察使追封南康侯夫人張氏封壽昌縣君子男士侂早卒士泉右監門率府率其季與女皆幼君仁而好學其卒也宗室皆憐傷其葬也以熙寧二年二月十七日葬河南永安縣銘曰

爵之尊祿之殖維年之卑不配德

贈華州觀察使追封華陰侯仲龐墓誌銘

鞏縣志卷二十三

文徵一

奎

經川圖書館刊

王安石

公諱仲龐字子厚濮國公宗樸之子濮安懿王諱允讓之孫魯恭靖王諱元份之曾孫也母曰蕭國夫人王氏以皇祐元年賜名除太子右內率府副率二年改太子右監門率府率嘉祐五年改右千牛衛將軍八年改右監門衛大將軍治平二年領嘉州刺史四改右武衛大將軍領雅州團練使熙寧元年年二十四以三月三日卒上爲不視朝一曰內出司賓祭弔贈華州觀察使追封華陰侯公生而秀麗長而聰敏於宗室爲好學上承下撫無不得意故其卒哭者皆盡哀妻馬氏封平安縣君女一人尙幼公以熙

寧二年二月十七日葬河南府永安縣銘曰

維漢世封實承安懿公緒厥慶尙忠有嗣奄其喪矣一女之存歸銘幽宮以慰公魂

贈奉寧軍節度使追封祁國公宗述墓誌銘

王安石

公諱宗述字子耆韓恭懿王諱元偃之孫而東平郡王名允弼之子也以天聖元年生以景祐元年賜名除右侍禁歷太子右司禦率府任監門衛將軍左屯衛大將軍廉州刺史陽州團練使濰州嘉州防禦使熙寧元年正月十八日以不起聞上幸其第奠哭之贈奉寧軍節度使追封祁

鞏縣志卷二十三 文徵一

奎

經川圖書館刊

國公越明年二月十七日葬河南永安縣公重厚寡笑言內行治未嘗有謫樂振施知音樂善射尤爲東平王所愛妻任氏安樂郡君子男七人仲珍仲俶仲誘仲庇仲疇仲珍早卒兩人未名而死銘曰

維德之嘉維能之多惟命之不遐宗室之嗟

右監門衛大將軍世耀故妻仁壽縣君康氏墓誌銘

王安石

皇族右監門大將軍世耀之妻康氏故內殿崇班閣門祇候遵度之子祖曰廷翰皇任磁州防禦使曾祖曰碩皇贈左千牛衛大將軍以嘉祐三年爲宗婦封仁壽縣君生一

子令優爲右千牛衛將軍而以熙寧元年六月九日疾病
死享年二十有六自爲女子以至於爲母卑尊幼長無所
非議故於其死皆哀憐二年二月十七日葬河南永安銘
曰
芒乎其孰致而來奄乎其孰推而往爲之幽宮覆以新壤
魂浮氣游變化惚恍宛其德音尙可追想

右千牛衛將軍仲焉故妻永嘉縣君武氏墓誌銘

王安石

皇族右千牛衛將軍仲焉之妻故永嘉縣君武氏內殿崇
班掖之子故左班殿直昭遜之孫贈尙書工部侍郎崇亮

鞏縣志卷三十三

文徵一

齋

經川圖書館刊

之曾孫年十八以熙寧元年十二月十四日棄世以明年
二月十七日葬河南永安縣君在襁褓父母以爲婉及嫁
節儉慈仁人稱之銘曰

象服之粲兮容車之皖兮歸於陵陂哀歌以相挽兮摛銘
壙石之幽以告遠兮

贈右屯衛大將軍世仍墓誌銘

王安石

君諱世仍字季遷宣城郡公從審第十子宣城以越懿王
諱德昭爲祖以安定郡公諱惟和爲考君母曰渤海郡夫
人吳氏實山南東道節度使元辰之孫娶潘氏鄭王美之
孫也年二十二生二男子一女以熙寧元年八月二十三

日卒於是官至右千牛衛將軍制以右屯衛大將軍告其第用二年二月十九日葬於河南府永安縣君授尙書能通章句然喜飲酒以故得疾死銘曰

有昭其明有韡其榮維其弗馮以隕其生

言永昭陵建寺劄子

司馬光

臣竊聞近有中旨於永昭陵側別建一寺未知信否果如此竊恐不可何則宣祖太祖太宗三陵共有一寺若獨於真宗仁宗各置一寺則是尊奉之禮踰於祖宗豈特於體理不順爲朝廷闕失亦是違先帝之孝心也議者或謂三陵共在一處永定永昭相去稍遠以此須別建一寺凡臣

鞏縣志卷二十三

文徵一

奎

經川圖書館刊

察之家無人守墳乃於墳側置寺暗以微利使之守護種置而已至於國家守衛山陵有司備具置寺之處何較近遠若云資薦求福則死生之際人不能知釋氏所言虛實難驗使亡者冥然無知則資薦之益有何所益果然有知如釋氏所言則仁宗皇帝寬慈恭儉好生惡殺恩洽四海澤被萬物豈待別置一寺更度數僧然後得生天堂樂處也且仁宗皇帝晚年詔天下無名額寺屋及百間者並特與名額計創添寺額千有餘處據此功德宜享壽考無疆之福而數月之間宮車晏駕以此驗之佛不能爲人之福豈不顯然此皆皇太后與陛下所親見也今自國喪之後

支給賞賜供奉山陵帑藏空虛賦役煩多百姓罷弊京西去秋不稔春復少雨正是朝廷宵衣旰食存恤之時乃復興此無名之役不急之費誠非中外所望也若萬一有益於先帝羣臣豈敢愛惜今逆禮傷孝蠹財勞人但使僧徒及監修之人因此爲名妄求恩澤以廣徼倖之路臣竊爲朝廷不取也伏望陛下與皇太后深思當今切務汲汲於富國安民息此無益之事以副天下之望其永昭陵寺只乞依前來指揮更不別置取進止

華陰侯仲連墓誌銘

熙寧二年

司馬光

華陰侯仲連字齊賢魏恭憲王元佐之曾孫郇國公允成

鞏縣志卷二十三

文徵一

美

經川圖書館刊

之孫遂昭裕公宗顏之長子母曰太原郡君郭氏初除右內率府副率歷率府率右千牛衛將軍右監門衛大將軍英宗卽位遷右武衛大將軍撫州刺史今上卽位遷右羽林大將軍長州團練使侯幼不好弄長而樂善學尤精于漢書昭裕公素好學喜爲詩藏書萬卷侯能嗣承其志目其詩曰貽慶集熙寧二年五月戊子以疾終享年三十有六上爲之輟視朝一日追贈華州觀察使封華陰侯夫人長安縣君劉氏男一人長曰士轡早卒幼曰士類右內率府率女六人四早卒二未嫁以某年十一月癸酉葬永安縣銘曰

昭裕愛子以詩書教名而藏之志在則倣能守富貴爲諸侯孝

右屯衛大將軍令邦墓誌銘

熙寧二年

司馬光

右千牛衛大將軍令邦字安國冀康孝王惟吉之曾孫丹陽僖穆王守節之孫右龍武軍大將軍隴州防禦使世符之子也母曰南陽縣君張氏將軍生五年除太子內率府副率英宗卽位遷右監門率府率今上踐祚遷右千牛衛將軍熙寧二年五月甲戌遇疾卒年十九贈右屯衛大將軍治平初英宗詔宗子無幼長皆就學差其年爲大中小三宮各置師以教之將軍時年十二從父南康修孝王愛

鞏縣志卷二十三

文徵一

奎

經川圖書館刊

其才性命爲小學錄以表率羣兒及年十五以新制試孝經論語於大宗正司二宗正以其誦習最精屢稱歎之將軍起謝不敏拜於牀下衆益美其警悟而不伐遂升中學授左氏春秋將軍事親至孝親有疾至焚香於臂以禱請然親有過未嘗不諫爭其所爲得禮義類皆如此不幸早世識之者無親疏共惜之二子男未名而卒女尙幼是歲十一月癸酉葬於永安縣銘曰

學則敏行則孝志業修宜遠到命不融衆所悼

皇從姪右屯衛大將軍士虬墓記

熙寧二年

司馬光

右千牛衛將軍士虬右武衛大將軍果州團練使齊安郡公仲郃之子贈安化軍節度觀察留後高密郡公宗望之孫贈安遠軍節度使同中書門下平章事密國公允言之曾孫也母曰安康縣君李氏將軍生五歲以例賜名除右內率府副率明年遷右監門率府率今上踐阼遷右千牛衛將軍幼而秀慧不嬉戲異於常兒七歲始就學授孝經孜孜不舍晝夜教授劉仲章老儒生常於廣坐問之曰將軍誦孝經果有何得對曰事親孝故忠可移於君居家理故治可移於官此其所得也仲章驚歎曰異日長成必爲德器數年愈自修立有成人之風親親尊尊動皆應法問

鞏縣志卷二十三

文徵一

突

經川圖書館刊

安祿膳朝夕無倦不幸遇疾以熙寧二年五月丙戌卒年十二宗室其嗟惜之朝廷贈右屯衛大將軍其年十一月癸酉葬永安縣謹記

永昭陵永厚陵十月一日奉告仁宗英宗皇帝旦表
本 韓 維

伏以四時平運適當歛用之初萬物阜成可備登嘗之盛恭惟尊諡皇帝崇功邁古遺德在民超然沛邑之游凜若宣臺之畏永言瞻慕交極悲摧

永厚陵奏告英宗皇帝忌辰表本

韓 維

伏以流星不居真游寢遠薦臨諱日徒仰英風恭惟諡號

皇帝德邁古初仁覃方外神有百年之畏道惟萬世之承
攀慕無從悲摧空極

永昭陵永厚陵正月一日旦表本

韓維

伏以斗建于寅在時爲首帝乘乎震厥德尙仁恭惟尊諡
皇帝履道協中垂謨裕後舉三朝之會固仰止之無
九清之游豈度思之可及永言感慕徒極悲摧

永昭永厚陵奏告仁宗英宗皇帝五月一日旦表

韓維

伏以薰風從律適戒於盛陽濡露感心空嗟於急景伏惟
尊諡皇帝豐功及物遺澤在民仰流慶於後昆復承休於

鞏縣志卷二十三 文徵一

充

經山圖書館刊

大業永惟謨訓第極悲摧

永昭陵永厚陵六月一日表本

韓維

伏以斗杓改建肇臨未位之初天序平分茲得土行之正
伏惟尊諡皇帝仁功丕育眷澤旁流民懷堯壤之歡世積
軒臺之畏願惟眇質嗣守成基仰颺御之莫追悵露濡而
增感

十月一日永昭陵下宮開啟次薦仁宗皇帝道場齋

文

韓維

寒律肇新真游滋遠履嚴霜而結慕望佳氣以馳誠爰舉
秘文式修勝會庶期福祐仰薦威神

昭厚陵寺上梁祭告太歲諸神祝文 韓 維

伏以祇奉寢園肇興棟宇上嚴勝利仰薦真游屬寶勢之垂成繫神休之協相爰陳薄祭尙監精誠

榮王從式墓誌銘

韓 維

王諱從式字智今皇帝之從伯父也太祖孝明皇后生楚康惠王德芳康惠王生昭信軍節度使兼侍中英國公惟憲王卽英國公第二子也天禧三年始賜名授右侍禁四遷至東八作副使景祐二年換左千牛衛大將軍慶歷四年兼彭州刺史稍遷右屯衛大將軍台州團練使嘉祐五年領蘄州防禦使英宗卽位正授磁州防禦使兄從古薨

鞏縣志卷二十三 文徵一

半

經川圖書館刊

襲封舒國公進涇州觀察使上卽位之明年以王太祖之系屬近且尊超拜彰化軍節度觀察留後封安定郡王王足疾不能朝有詔卽其家拜之王素信忠義自以宗室之老蒙國厚恩病無以報慨然恨歎見於色辭後三年制授保康軍節度使其年十一月病亟上遣中貴人挾太醫診視王一旦盡出玩好物會宗族散之曰吾必不起矣後數日而薨時熙寧四年十二月八日也年六十有五上聞惻然爲輟視朝卽日臨奠追贈同中書門下平章事封榮王命右正言知制誥曾布入內都知張茂則監護喪事以五年五月二十三日葬於河南永安縣王儀狀秀整幼敏悟

於經史汎爲疏通喜賦詩尤精於筆翰得虞世南之法爲多仁宗讌宗室於太清樓出裸玉詩題使賦之王立成仁宗大加賞元昊叛西鄙騷動王抗疏願身臨陣操戈討賊仁宗壯之而不許也居母夫人憂未嘗飲酒茹葷惟日誦佛書資奉儉約居室服用不華侈歷事四朝踰五十年非有疾未嘗廢朝嘗謂其族人曰若等旣不任事惟朝謁爲奉上之■尙可以少懈耶臨終又戒其子弟以嚮學諸族雍睦嗚呼可謂賢王也已夫人高氏西頭供奉曰習之女封高平郡君有賢行前此十二年卒子男三人長世謨右騎衛大將軍■州刺史早卒追贈隨州觀察使漢東侯次

鞏縣志卷二十三

文徵一

圭

經川圖書館刊

世采右羽林軍大將軍茂州團練使次世恩右武衛大將軍梅州刺史孫男十六人令嗟右監門衛大將軍令祁令祛令覲令駒右千牛衛將軍令晝令岳令璋令術令璘率府率令瓌右班殿直五人未賜名曾孫一人子禮尙幼孫女三人西頭供奉官王端卿右班殿直張某高師言其壻也曾孫女十二人■孫女一人皆幼銘曰

赫赫太祖仁有萬方慶流本支或公或王王惟曾孫忠厚質良文史之游法度是將熙寧之二元特見表揚尊爵重鎮卽授于陽扶疾祇命慨然自傷懷忠思奮言出涕滂有志不效以訖云亡宸衷震悼賻恤加常爰詔侍臣俾識厥藏

巍然令名愈久益光

延安郡太君張氏墓誌銘

畢仲游

夫人姓張氏其上世嘗顯功于建隆開寶之間號爲勳臣
夫人年十有八歸王氏爲故秦王審琦曾孫西頭供奉官
堯善之婦生二男四女而一尙皇叔故贈太師尙書令荆
徐二州牧魏王爲潭國夫人因得召見禁中賜冠陂元豐二
年魏王有疾神宗皇帝與慈聖光獻太后宣仁聖烈太后
皆幸東宮視之疾少閒潭國夫人入謝詔問其家世贈供
奉府君成州團練使封夫人延安郡太君魏王亦爲夫人
起大第于里中而子溥又賢好學通書爲文章以從科舉

夫人益自慰乃捐金帛賙其宗族及賑施里中之不能自
存者而居家嚴飭不妄喜笑縞衣蔬食齋戒從浮圖法末
嘗爲戚里閒事元祐九年三月九日以疾卒其年月二
十九日庚午葬于河南府永安縣蘇村秦王之墓次溥之
遭夫人喪也東平畢某往弔之拜首稽顙號泣自云罪罰
不孝以喪夫人不自死滅尙惟後世之圖今葬有日矣事
嚴而迫願以誌銘爲屬乞哀而許之按夫人曾祖諱繼昱
左藏庫使祖諱崇雋洛苑使賀州刺史父諱武仲三班借
職世居鄭州之管城夫人之男長曰涇先夫人卒次卽溥
也皆右班殿直女長適皇叔寧遠軍節度使鞏國公宗祐

封永寧郡夫人先卒次適應天府虞城縣主簿趙彥次適
皇叔龔州防禦使仲憫封靖安郡君亦先夫人卒其幼卽
潭國夫人潭國爲神宗之弟婦今上之叔母宣仁聖烈太
后之子婦則其母亦不賤而夫人乃持麤菲食勉其子以
儒素調宗族賑閭里以清淨自娛樂非賢夫人能若是乎
夫人年六十九一孫男三孫女其孫男名伯鸞云銘曰
維王氏有造于國以基厥家侯王閒起踵成其華夫人何
歸秦王之裔生子何從魏王之配子配魏王有燁其芳英
祖宣仁實爲姑嫜夫人爲母不泰而約匪車輿是憎以約
爲樂矧其有子敬恭朝夕夫人燕之旣壽且懌匪夫人是
銘孰爲茲石

宗室金紫光祿大夫檢校太子賓客右武衛大將軍
秀州團練使贈鄆州觀察使追封東平侯趙公行狀
曾祖諱惟忠彰化軍節度使舒國公

祖諱從謹宣州觀察使

父諱世崇洛州防禦使

楊傑

公諱令蟻字景珍皇祐元年八月生于邸第二年四月仁
宗賜名授右內率府副率明堂覃恩改左內率府率嘉祐
五年改右千牛衛將軍八年英宗卽位覃恩改左監門衛
大將軍使持節濠州諸軍事濠州刺史熙寧十年改左武

衛大將軍使持節秀州諸軍事秀州刺史充本州團練使
其散官勳封食邑累加至金紫光祿大夫檢校太子賓客
兼御史大夫上柱國天水郡開國公食邑三千戶食實封
三百戶元豐五年八月某日以訃聞贈鄆州觀察使追封
東平侯八年三月先帝登遐詔舉葬于西京永安縣某原
禮也公四歲而孤天資信厚出就外傅日誦千言諸父兄
以成人期之及長博覽載籍尤專詩書通知風教之本閒
爲篇章歌詠皇化有文集三卷傳于家每與人接則謙和
雍容非禮義不道故終始無悔吝人有急難則調之凡親
族中議論有所未決者多質于公其爲人信重如此其事

鞏縣志卷二十三

文徵一

書

經川圖書館刊

尊親以孝稱母福昌夫人疾寢不解衣藥必躬嘗晨昏不
敢違去左右及夫人喪號慕過哀遂致危困捐館之日召
諸子立于前以告之曰吾幸生宗室蒙累朝德澤保奉先
人祭祀至于今日不幸不得見汝等長立豈非修短有數
耶吾平生無玩好唯翰墨簡冊而已吾死當陳設翰墨簡
冊于前足矣毋以華靡爲尙因索飛白筆書清白風月四
字迺云此可以傳示子孫乃奄然而逝年三十有五娶陳
氏封樂壽縣君子男六人長曰子灝右內率府副率次不
育次子沆次子沆並三班奉職次子浣子澆未仕女四人
長適鎮戎軍判官柳榮餘未嫁嗚呼公乎太祖皇帝之六

世孫中書令吳懿王之元孫舒國公之曾孫宣城侯之孫
洺州防禦使之子承派天潢生長宗邸其勢豈不貴且重
哉而能不驕不侈尊賢樂善存心經史敦行孝悌內爲親
族所愛外爲搢紳所稱可謂賢公子矣而其壽不及中間
者哀之敢書其實以告有司謹狀

宗室世系表廣平侯世崇此爲行狀所及令蠙以天水
郡開國公追封東平侯按職官志爵一十二王嗣王郡
王國公郡公開國公開國郡公開國縣公開國侯開國
郡公在第七開國侯在第九而郡公之下開國公之上
應有郡侯一階令蠙自開國郡公追封決非開國侯可
知宗子封郡侯者至多則職官志之漏略也

